


廣名將傳  
四





廣 名 將 傳

(四)

黃道周註斷

# 廣名將傳卷十三

## 尹繼倫

尹繼倫開封浚儀人。父勳爲郢州防禦使。嘗內舉繼倫以爲可用。太宗卽位。以從征太原。功使充北而緣邊都巡檢使。端拱中。契丹潛入寇。上遣李繼隆護送輜重數千乘。契丹將于越諜知之。率精銳數萬騎。將邀于路。繼倫適領兵遊徼路。與寇直于越。徑趨大軍。過繼倫軍。不顧而去。繼倫謂其麾下曰。寇蔑視我爾。彼南出而捷。還則乘勝驅我而北。不捷。則亦洩怒于我。將無遺類矣。爲今日計。但當捲甲啣枚以躡之。彼銳氣前驅。不虞我之至。力戰而勝。足以自樹。縱死。猶不失爲忠義。豈可泯然而死。爲胡地鬼乎。衆皆憤激。從命。繼倫令軍秣馬。伺夜。人持短兵潛躡其後。行數十里。至唐川徐河。天尙未明。于越去大軍四五里。會食訖。將戰。繼隆方陣于前。以待。繼倫從後。忽擊殺其將皮室一人。皮室者契丹相也。皮室被殺。衆遂驚潰。于越方食失箸。爲短兵中其臂。創甚。乘善馬先遁。寇兵隨之大潰。蹂殘死者無數。契丹自是不敢窺邊。每相戒當避黑面大王。以繼倫面黑故也。以功領長州刺史。至道二年。分遣將帥五道。以討李繼遷。上疑李繼隆逗遛不進。急召繼倫至京師。授靈慶副都部署。欲以夾輔繼隆。時繼倫已被病。強起受詔。上素聞其嗜酒。以上尊酒賜而遣之。卽日赴行營。僅至慶州卒。

斷曰

尹子繼倫領軍巡徼。繼隆擁輻于越。欲擾兵過尹前。視之如草。繼倫怒。噴激衆共討。俟其前驅。忽從後搗斬相皮室于越。驚倒臂中短兵。萬馬奔跑。潰兵蹂躪。死者不少。黑面大王戒避須蚤。再奉詔行。奈命不保。

### 狄青

狄青字漢臣。汾州西河人。善騎射。寶元初。趙元昊反。詔擇衛士從邊。時偏將屢爲賊敗。士卒畏怯。惟青願行。常爲先鋒。凡四年。前後大小二十五戰。中流矢者八。破金湯城。略宥州。屠囉咩等族。燔積聚數萬。收其帳二千三百。生口五千七百。又城喬子谷。築大郎等堡。皆阨賊要害。嘗戰安遠。被創甚。聞寇至。卽挺起馳赴。臨敵披髮帶銅面具。出入賊中。皆披靡不敢當。尹洙爲經略判官。青見之。洙與談兵善之。薦于經略韓琦。范仲淹曰。此良將材也。二人見而奇之。待遇甚厚。仲淹以左氏春秋授之。曰。將不知古今。匹夫勇耳。青折節讀書。由是益知名。青奮起行伍。十餘年而貴。是時而涅猶存。帝嘗敕青傳藥除字。青指其面曰。陛下以功擢臣。不問門第。臣所以有今日。由此涅耳。臣願留此以勸軍中。不敢奉詔。皇祐中。廣德州蠻儂智高反。陷邕州。嶺南騷動。師久無功。敕孫沔余靖爲安撫使討賊。猶以爲憂。青因白請于帝曰。臣起行伍。非戰伐無以報國。願得蕃落騎數百。益以禁兵。羈賊首於闕下。帝壯其言。遂除宣徽南院使。經制廣南盜賊事。置酒垂拱殿而遣之。時智高還據邕州。青合孫沔余靖兵次賓州。先是蔣偕張忠戰敗。軍聲大沮。廣西鈴轄陳曙乘青未至。復以步卒八千犯賊。潰于崑崙關。殿直袁用等皆遁。青至乃曰。令之不齊。兵所以敗。

晨會諸將堂上。揖曙起。並召用等三十人。按以敗亡狀。俱驅出軍門斬之。沔靖相顧錯愕。諸將股慄。已而頓申令。軍中休十日。賊覘者以爲軍未卽進。清明日。乃整軍騎。一晝夜絕崑崙關。出歸仁鋪爲陣。賊旣失險。悉出逆戰。前鋒孫節搏賊死山下。賊氣銳甚。沔等懼失色。青執白旗。麾騎兵縱左右翼。出其不意。遂大敗之。追奔五十里。斬首數千級。智高縱火燒城遁去。明日。檢賊屍。有衣金龍衣者。衆謂智高已死。欲以上聞。青曰。安知非詐耶。寧失智高。不敢誣朝廷以貪功也。始交阯願出兵助討智高。余靖言其可信。具萬人糧于邕。欽待之。詔以緡錢三萬。賜交阯爲兵費。許賊平厚賞之。青旣至。檄余靖無通使假兵。卽上奏曰。李德政聲言將步兵五萬騎一千赴援。非其情實。且假兵於外以除內患。非我利也。以一智高而橫蹂二廣。力不能討。乃假兵蠻夷。貪得忘義。因而起亂。何以禦之。請罷交阯助兵。從之。及賊平。人服其有遠慮。青在樞密四年。每出。卒輒指日以相矜誇。因而出判陳州。卒贈中書令。青爲人慎密寡言。其計事必審中機會。而後發行。師先正部伍。明賞罰。與士卒同饑寒勞苦。敵猝犯之。無一士敢後先。故其出常有功。尤喜推功與將佐。始與孫沔破賊。謀一出于青。賊旣平。經制餘事。悉以諉沔。退若不用意者。沔始歎其有勇。旣而服其爲人。自以爲不如也。

斷曰

狄青爲將。戰功紛紛。帶銅面具。所向吸魂。朝野名重。而涅猶存。帝命藥去。請留勸軍。儂智高反。衆敗崑崙。青怒盡斬。突出關門。賊出不意。大敗而奔。高死未確。不敢妄聞。智高一叛。青已早論。破之亦易。何假

于人賊平之後。方服其神。

种世衡

种世衡字仲平。放之兄子也。少尚義節。昆弟有欲析其資者。世衡盡推與之。惟取圖書而已。以放蔭補官。時西邊用事。守備不足。世衡因建言。延安東北二百里。有故寬州。請因其廢壘而興之。以當寇衝。右可固。延安之勢。左可致河東之粟。北可圖銀夏之舊。朝廷從之。命董其役。夏人屢出爭。而世衡且戰且城之。然處險無泉。議不可守。鑿地百五十尺。始至於石。石工辭不可穿。世衡卽命屑石一畚。酬百錢。卒得泉。城成。賜名青澗城。遷內殿崇班。知城事。遂開營田二千頃。募商賈。貸以本錢。使通貨贏其利。城遂富實。間出行部族。慰勞酋長。或解與所服帶。嘗會客飲。有得敵情來告者。卽以飲器與之。由是屬羌皆樂爲用。再遷洛宛副使。知環州。番部有牛家族。奴訛者。素倔強。未嘗出謁郡守。聞世衡至。遽郊迎。世衡與約。明日常至。其帳勞其部落。是夕大雪深三尺。左右曰。地險不可往。世衡曰。吾方結諸羌以信。不可失信。遂緣險而進。奴訛方臥帳。謂世衡必不能至。世衡蹙而起。奴訛大驚曰。前此未嘗有官至吾部者。公乃不疑我耶。率其族羅拜聽命。又羌長慕恩部落最強。世衡嘗夜與飲。出侍姬以佐酒。旣而佯起入內。潛於壁隙窺之。慕恩竊與侍姬戲語。世衡遽出掩之。慕恩慙懼。請罪。世衡乃笑曰。君欲之耶。卽以遣之。由是得其死力。諸部有貳者。使討之。無不克。其後百餘帳皆自歸。因令諸族置烽火。有急則舉燧。介馬以待。葛懷敏敗。率羌兵數千人。以援涇原。無敢後者。嘗課吏民射。有過失。射中則釋其罪。有辭某事。請某事。輒因中否。而與奪之。人人

自勵。皆精于射。由是數年。敵不敢近環境。范仲淹檄令與蔣偕築細腰城。世衡時臥病。起將所部甲士晝夜興築。城成而卒。初世衡在青澗城。元昊未臣。其貴人剛浪陵號野利王。又一將遇乞號天都王。皆元昊腹心。親信用事。欲以謀間之。未得其隙。會剛浪陵令浪埋。賞乞媚娘。三人詣世衡請降。世衡知其詐。曰。與其殺之。不若因以爲間。遂留以監商稅。出入騎從甚寵。有僧王光信者。趨勇善騎射。習知番部山川道路。世衡出兵。常使爲鄉導。改名嵩。世衡爲蠟書。遣嵩遺剛浪陵。內言浪埋等已至。朝廷知王有向漢心。命爲夏州節度使。俸錢月萬緡。旌節已至。等語令嵩密藏衣中。非濱死不得泄。別以棗一甌。畫龜一幅。遺野利以諭其早歸之意。剛浪陵得之大懼。命執嵩歸元昊。元昊疑剛浪陵已召嵩廷詰。問書所在。嵩堅執無有。雖甚箠答不言。元昊命曳出斬之。嵩乃大號曰。種將軍密遣野利王書。戒不得輕泄。今至死不了得將軍事。卽解衣出書。書入。元昊遂疑野利陰遣別將假爲野利使。使于世衡。傳野利語。世衡審知爲元昊所遣。轉謾罵元昊。盛稱野利內附之意。仍厚遣使者曰。爲我歸語汝主。速決無稽留也。使者去。嵩卽還。而野利已報死矣。世衡知謀已行。因欲並間天都王。又置祭境上。作文書于板以弔之。多述野利與天都相結。有意本朝。悼其垂成而敗之意。遺於境上。傳聞于元昊。並殺天都王。遂復遣使請降。稱臣如舊。世衡在邊數年。積穀通貨。不煩縣官。大有恩惠。及卒。羌長朝夕臨者數日。青澗及環人皆畫像祠之。

斷曰

种子世衡。少尙氣節。有事西邊。心盡力竭。旣爲築城。又將泉掘。先開營田。復貸商業。荒涼邊城。富如帝

闕行部慰勞。羌長陰結。敵帳往還。不憚大雪。敵感且懷。拜皆羅列。以酒醉之。再贈姬妾。若有所圖。死亦勇決。種類猜嫌。因而間別。所忌掃除。所憎撲滅。勢獨歸降。不生釁孽。所以邊庭常清常潔。

郭達

郭達字仲通。其先自邢徙洛。達始隸陝西范仲淹麾下。仲淹方議取靈武。達曰。地遠而食不繼。城大而兵不多。未見其利。未幾。涇原任福以全軍沒。人服其先見。陳執中安撫京東。奏達爲駐泊將。執中嘗與賓佐論當世名將。共推葛懷敏。達曰。懷敏喜功徼幸。徒勇無謀。易與耳。他日必敗朝廷事。執中歎曰。君直知兵。已而懷敏果覆師。保州卒叛。田況遣達往招之。達與亂首待其臻。嘗同事范仲淹。因馳至城下。示以舊所佩紫囊。臻識之。卽與其黨再拜。邀達登城。旣見。申諭禍福。衆疑不卽下。達曰。若降恐不免。達請以身爲質。於是開城降。龐籍鎮河東。俾達權忻州。契丹來求天池廟地。以無稽也。籍不能決。以諉達。達訪得太平興國中故牘。證爲王土。檄報之。契丹愧伏。湖北溪蠻彭仕義叛。達招得蠻所親信爲鄉導。盡平諸隘。遂破其所居桃花州。仕義棄城走。衆悉降。神宗卽位。改宣徽南院使。判鄆州。是時种諤受嵬名山降。因取綏州。夏人遂殺楊定。朝論以邊釁方起。欲棄綏州。達曰。敵殺王官。而又棄綏不守。見弱已甚。且名山舉族來歸。常何以處。旣而夏人欲以塞門安遠二砦來易。朝廷許之。達曰。此正商於六百里之策也。非先交二砦不可。與遣其屬趙高等與夏使議。夏使惟言砦基高。曰二砦之北。舊有三十六堡。且以長城嶺爲界。西平王祥符所移。書固在也。敵使驚不能對。乃寢其請。初詔焚棄綏州。達匿而不下。至是帝問大臣。皆不知。達始自



勅向者違詔旨之罪。帝手詔褒答之。夏人又求以亡命景詢易名山。達曰：詢庸人也。于事何所重輕。受之則不得不還名山。恐自是番人無復敢向化矣。達謂得殺楊定首領姓名。詐告將斬之於境。以謝罪。達曰：是且梟死。犯以給我。報曰：必執李崇貴韓道喜來。夏人言殺之矣。達命以二人狀貌物色詰問。敵情得。乃執獻之。達慷慨喜兵學。神宗常訪以八陣遺法。達對曰：兵無常形。是特奇正相生之一法耳。因爲帝論其詳。在延安。使人教兵。久不就。乃擇習金鼓屯營者六十四人。使一人教一隊。頃刻而成。就李復圭治慶州之敗。旣斬李信。又欲罪鄜延巡檢白玉。玉見達。托以後事。且泣言不得終養。達哀之不遣。申救甚力。得免。已而玉大捷於新砦。神宗謂達曰：白玉能以功補過。卿之力也。達每戰先招懷。後戰鬪。惜士卒。不妄加誅戮。其殺賊婦女老弱者。皆不賞。雖坐征南無功久廢。猶隱然爲一時宿將云。

斷曰

郭達談兵。頗有先見。任福覆軍。懷敏師陷。一如其言。誰不欽羨。保州招降。登城戒勸。恐衆有疑。留身爲券。廟地契丹。無稽思占。故牘查明。王土可驗。湖北溪蠻。仕義有變。招蠻之親。爲蠻之患。若棄綏州。弱見于面。匿詔不宣。後方無玷。坐論成功。勝于力戰。

王詔

王詔。字子繩。江州德安人。試制科不中。客遊陝西。訪采邊事。詣闕上平戎策三篇。其略以爲西夏可取。欲取西夏。當先復河湟。則夏人有腹背受敵之憂。夏人比年攻青唐不能克。萬一克之。必並兵南向。大掠秦

渭之間。牧馬于蘭會。斷古渭境。盡服南山。生羌西築武勝。遣兵時掠洮河。則隴蜀諸郡常盡驚擾。瞎征兄弟其能自保耶。今唃氏子孫。惟董氈粗能自立。瞎征欺已溫之徒。文法所及各不過一二百里。其勢豈能與西人抗哉。武威之南。至于洮河蘭部。皆故漢郡縣。所謂湟中。浩亶大小榆。抱罕。土地肥美。宜五種者在焉。幸今諸羌瓜分。莫相統一。此正可併合而兼撫之時也。諸種既服。唃氏敢不歸。唃氏歸。則河西李氏在吾掌中矣。且唃氏子孫。瞎征差盛。爲諸羌所畏。若招諭之。使居武勝。或渭源城。使糾合宗黨。制其部族。習用漢法。異時族類雖盛。不過一延州李士彬。環州慕恩耳。爲漢有肘腋之助。且使夏人無所結連。策之上也。神宗異其言。召問方略。因以詔管幹秦鳳機宜文字。時番部俞龍珂在青唐最大。詔因按邊。引數騎直抵其帳。諭以成敗。招致之。龍珂遂率屬十二萬口內附。帝乃志復河隴。築古渭爲通遠軍。以詔知軍事。初羌保險。諸將謀置陣平地。詔曰。賊不舍險來鬪。則我師必徒歸。今已入險。常使險爲吾有。乃徑趨棗邦山。壓敵軍而陣。令曰。敢言退者斬。賊乘高下鬪。師小卻。詔乃躬擐甲胄。麾帳下兵逆擊之。羌大潰。焚其帳而還。洮西大震。會瞎征度洮爲之援。餘黨復集。詔乃潛師越武勝。遇瞎征首領瞎藥等。與戰破之。遂城武勝。建爲鎮。洮軍復擊走瞎征。降其部落二萬人。更名鎮洮爲熙州。以熙河洮泯通遠爲一路。會景思立敗于踏白城。賊圍河洲。詔聞之。日夜馳至熙方城守。命撤之。選兵得二萬。議所向。諸將欲趨河州。詔曰。賊所以圍城者。恃有外援也。今知我至。必設伏待我。且新勝氣銳。未可與爭。當出其不意。以攻其所恃。此所謂批亢擣虛。形格勢禁。則自爲解者也。乃直扣定羌城。破結河族。斷夏國通路。瞎征知援絕。拔柵去。初思立

之覆師也。羌勢復熾。朝廷議棄熙河。帝爲之旰食。數下詔戒詔持重勿出。及是。帝乃大喜。詔還熙。以兵巡西山。繞出踏白後。焚八千帳。瞎征窮蹙。丐降。因俘以獻。拜詔觀文殿學士。未幾。召爲樞密副使。詔欲求退。因言。決里廣源之建。臣以爲貪虛名而忘實禍。執政乃疑臣爲譏刺。方舉事之初。臣力爭極論。欲寬民力。而省財用。但同列不肯聽。至以熙河事折臣。臣本意不費朝廷。而可至伊吾廬耳。初不欲令熙河作路。河岷作州也。今與衆異論。倘不求退。必致不容。帝見其以勤兵費財歸曲朝廷。由是不悅。故罷職知洪州。四年。病疽卒。詔起孤生。用兵有機略。臨出師。召諸將授以指麾。不復更問。每戰必捷。嘗夜臥帳中。前部遇敵。矢石已交。呼聲震山谷。侍者往往股慄。而詔鼻息自如。詔交多楚人。依詔求仕。乃分屬諸將。或殺降羌老弱。予以首爲功級。晚節言動不常。頗若病狂。旣病疽。洞見五臟。蓋亦多殺之徵云。

### 斷曰

王詔有志。上策平戎。西夏可取。河西掌中。神宗驚異。機宜與衷。龍珂招致。內附相通。帝復河隴。詔領軍。尤壓敵而陣。甲冑擐躬。麾兵逆擊。焚帳奏功。再議所向。直逞羌鋒。斷夏國路。使其不通。瞎征窮蹙。俘獻重贖。兵勤財費。歸曲聖聰。帝意不悅。罷職知洪。病雖疽卒。人亦稱雄。

### 种師道

种師道。字彝叔。少從張載學。以蔭爲熙州推官。議役法。忤蔡京旨。知德順軍。又謂其詆毀先烈。罷。入黨籍。屏廢十年。以武功知懷德軍。夏國書境。其使焦彥堅。必欲得故地。師道曰。如古故地。當以漢唐爲正。則君

家疆土益蹙矣。彥堅無以對。童貫握兵柄。翕張威福。見者皆旅拜。師道長揖而已。召詣闕。徽宗訪以邊事。對曰。先爲不可勝。來則應之。妄動生事。非計已。貫議徙內郡。弓箭手實邊。而指爲新邊所募。帝復訪之。對曰。臣恐勤遠之功未立。而近擾先及矣。帝善其言。賜襲衣金帶。以爲提舉秦鳳弓箭手。時五路並置官。帝謂曰。卿吾所親渥也。貫茲不悅。師道不敢拜。久之。知西安州。嘗督兵築佛口城。敵至。堅壁葫蘆河。師道陣於河澚。若將決戰者。陰使偏將曲充徑出橫嶺。揚言援兵至。敵方駭顧。而楊可世早潛軍衝其後。姚平仲復以精甲襲擊之。敵大潰。斬獲甚衆。其長僅以身免。卒城而還。又帥陝西河東七路。共征臧底城。期以旬日必克。旣薄城下。敵守備甚固。官軍小怠。列校有據胡牀自休者。立斬之。尸于軍門。令曰。今日城不下。視此衆股慄。譟而登城。城卽潰。時兵至纔八日。童貫謀伐遼。使師道盡護諸將。師道諫曰。今日之舉。如盜入鄰家。不能救。又乘之而分其室焉。無乃不可乎。貫不聽。旣次白溝。遼人譟而前。士卒多傷。師道先令人持一巨挺自防。賴以不大敗。遼使來請曰。女真之犯本朝。亦南朝之所甚惡也。今射一時之利。棄百年之好。結虎狼之鄰。其他日之禍。謂爲得計可乎。貫不能對。師道復諫以爲宜許之。又不聽。密劾其助賊。王黼怒。責爲右衛將軍致仕。而用劉延慶代之。延慶敗績於盧溝。帝思其言。起爲河北制置使。師道聞命。卽東過姚平仲。有步騎七千。與之俱北。至洛陽。聞幹離不屯京城下。或止勿行。曰。賊勢方銳。願少駐汜水。以謀萬全。師道曰。吾兵少。若遲回不進。形見情露。祇取辱焉。今鼓行而前。彼安能測我虛實。都人知我來。士氣自振。何憂賊哉。因揭榜沿道。言種少保領西兵百萬來。遂抵城西趨汴水南。徑逼敵營。金人懼。徙砦稍北。斂

游騎。但守牟駝岡。增壘自衛。時師道春秋高。天下稱爲老種。欽宗聞其至。喜甚。開安上門。命尙書李綱迎勞。入見。帝問曰。今日之事。卿意如何。對曰。女真不知兵。豈有孤軍深入人境。而能善其歸乎。帝曰。業已講和矣。對曰。臣以軍旅之事。陛下和非所敢知也。師道時被病。命毋拜。許肩輿入朝。金使王訥在廷。頡頏。望見師道。拜跪稍如禮。帝顧師道笑曰。彼爲卿故也。京師自被圍。諸門盡閉。市無薪菜。師道請啓城南壁。聽民出入如常。金人有擅過。偏將馬忠軍者。忠斬其六人。金人來訴。師道付以界旗。使自爲制。後無敢越佚者。种氏姚氏皆山西巨族。平仲父古。方以熙河兵入援。平仲慮功名獨歸种氏。乃以士不得速戰爲言。達於上。李綱主其議。令城下兵緩急聽平仲節度。帝自遣使趨師道戰。師道欲俟其弟師中至。奏言過春分。乃可擊。時相距纔八日。帝以爲緩。竟用平仲斫營。以及於敗。李綱罷。太學諸生都人伏闕。願見种李。詔趣使彈壓。師道乘車而來。衆褰簾視之曰。果我公也。相率聲喏而散。金師退。乃罷師道爲中太一宮使。御史中丞許翰見帝。以爲不宜解師道兵權。上曰。師道老矣。難用。當使卿見之。令相見於殿門外。師道不語。翰曰。國家有急。詔翰訪所疑。公勿以書生之故不肯談。師道始言。我衆彼寡。但分兵經營。控守要地。使彼糧道不通。坐以持久。可破也。翰歎味其言。復上奏。謂師道智慮未衰。尙可用。於是加少師。進太尉。爲河東宣撫使。屯滑州。實無兵自隨。師道請合關河卒。屯滄衛孟滑。備金兵再至。朝論以大敵甫退。不宜勞師。以示弱。卻不用。既而師中戰死。姚古敗。朝廷震悚。召師道還。太原陷。又使巡邊。次河陽。遇王訥。揣敵必大舉。亟上疏。請幸長安。以避其鋒。大臣以爲怯。復召還。既至。病不能見。十月卒。京師失守。帝撫膺曰。不用种師

道言以至於此。金兵之始退也。師道申前議。勸帝乘半濟擊之。不從。曰：異日必爲國患。故追痛其語。

斷曰

老种師道。宋末主兵。非貫不悅。卽忤蔡京。帝問邊事。不敗爲精。來則以應。妄動事生。遼功未立。近擾先驚。揚言援至。前擊後衝。敵潰斬獲。城功始成。再征臧底。斬惰先登。師纔八日。敵已削平。遼乃鄰也。伐之何名。白溝戰敗。轉互相傾。再起河北。或止勿行。師道亟進。直壓敵營。帝聞而喜。虜憚而停。平仲心忌。戰以速爭。种請少緩。帝亦不聽。旣而戰敗。功罪無憑。大都亂世。良將空稱。旣病而死。方痛撫膺。

宗澤

宗澤。字汝霖。婺州義烏人也。幼有大志。登進士第。廷對極陳時弊。考官惡其直。寘末甲。通判登州。朝廷遣使由登州結女真盟海上。謀夾攻契丹。澤語所親曰：天下自此多事矣。靖康元年。陳過庭薦澤充和議使。澤曰：是不生還矣。或問之。澤曰：敵能悔過。退師固善。否則安能屈節北庭。以辱君命乎。會議者謂澤剛方不屈。恐害和議。上因不遣。命知磁州。時太原失守。官兩河者。率托故不行。澤曰：食祿而避難。不可也。卽日單騎就道。磁經蹂躪之餘。人民逃徙。帑廩枵然。澤至繕城壁。浚隍池。治器械。募義勇。始爲固守不移之計。金人破真定。引兵南取慶源。自李固渡渡河。恐澤兵躡其後。遣數千騎直叩磁州城。澤擐甲登城。令壯士以神臂弓射走之。開門縱擊。斬首數百級。所獲羊馬金帛。悉以賞軍士。康王再使金。澤迎謁曰：肅王一去不返。今敵又詭辭。以致大王。願勿行。王遂回相州。未幾。有詔以澤爲副元帥。從王起兵入援。澤言宜急會。

兵李固渡。斷敵歸路。衆不從。乃自趨渡。道遇北兵。乃遣秦光弼張俊夾擊。大破之。金人既敗。乃留兵分屯。澤遣壯士夜擣其軍。破三十餘砦。時康王開大元帥府。檄兵會大名。澤履冰渡河。見王。謂京城受圍日久。入援不可緩。會曹輔齋蠟封欽宗手詔。至自京師。言和議可成。澤曰。金人狡獪。是欲款我師爾。君父之望。人援。何當飢渴。宜急引軍直趨澶淵。次第進壘。以解京城之圍。萬一敵有異謀。則吾兵已在城下。汪伯彥等難之。勸王遣澤先行。自是澤不得預府中謀議矣。二年正月。澤至開德。十三戰皆捷。以書勸王檄諸道兵會京城。又遣書總管趙野。范訥。曾懋等。合兵入援。三人皆以澤爲狂。不答。澤以孤軍進。都統陳淬言。敵方熾。未可輕舉。澤怒欲斬之。諸將乞貸淬。使進兵。遇金人敗之。金人攻開德。澤遣孔彥威與戰。又敗之。澤度金人必犯濮。先遣騎三千往援。金人果至。又敗之。金人復向開德。權邦彥孔彥威夾擊。又大敗之。澤兵進至衛南。度將孤兵寡。不深入。不能成功。先驅曰。前有敵營。澤揮衆直前與戰。又敗之。轉戰而東。敵益生兵。至。王孝忠戰死。前後皆敵壘。澤下令曰。今日進退皆死。不可不從。死中求生。士卒知必死。無不一當百。斬首數千級。金人大敗。退卻數十餘里。澤計敵十倍於我。今一戰而卻。勢必復來。使悉其鐵騎。夜襲吾軍。則危矣。乃募徙其軍。金人夜至。得空營。大驚。自是憚澤。不敢復出兵。時金人已逼二帝北行。澤聞卽提軍。至大名。欲徑渡河。據金人歸路。邀還二帝。而勸王之兵無一至者。又聞張邦昌僭位。欲先行誅討。會約文元帥書。約移師近都。按甲觀變。澤乃止不進。而屢表勸王卽帝位於南京。澤入見。涕泗交頤。陳興復大計。時金人有割地之議。澤上疏曰。天下者太祖太宗之天下也。陛下當兢兢業業。思傳之萬世。奈何遽議割

河之東西。又議割陝之蒲解乎。臣雖驚怯。當躬冒矢石。爲諸將先。上壯其言。欲留輔政。潛善等沮之。遂徙知開封府。時敵騎留屯河上。金鼓之聲。日夕相聞。而京城樓櫓盡廢。民兵雜居。盜賊縱橫。人情洶洶。澤既至。首捕誅舍賊者數人。下令曰。爲盜者賊無輕重。並從軍法。由是盜賊屏息。民賴以安。王善者。河東巨寇也。擁衆七十萬。欲據京城。澤單騎馳至善營。泣謂之曰。朝廷當危難之時。使有如公一二輩。豈復有敵患乎。今日乃汝立功之秋。不可失也。善感泣曰。敢不効力。遂解甲降。時楊俊號沒角牛。兵三十萬。王再興李貴王大郎等。各擁衆數萬。侵掠爲患。澤使人諭以禍福。悉招降之。上疏請上還京。時金遣人。以使僞楚爲名。至開封府。澤曰。此名爲使。而實覘我也。拘其人。乞斬之。有詔所拘金使。延置別館。澤復上疏曰。國家承平久。不識兵革。以敵國誕謾爲可憑信。恬不置疑。今金人假使僞楚。來覘虛實。臣乞斬之。以破其奸。而陛下惑于人言。令遷置別館。優加待遇。臣愚不敢奉詔。以彰國弱。上乃親札諭澤。竟縱遣之。澤憂金人入攻。乃渡河約諸將。議圖恢復。因於京城四壁各置使。以領招集之兵。又據形勢。立堅壁二十四所。沿河鱗次。爲連珠砦。又連結河東河北山水砦。忠義民兵。於是陝西京東西諸路人馬。咸願聽澤節制。澤視師河北。還。抗疏言。國家結好金人。欲以息民。卒之劫掠侵欺。無所不至。是守和議果不足以息民也。當時固有阿意順旨。以叨富貴者。亦有不和詭隨。以獲罪戾者。陛下觀之。叨富貴者爲是乎。獲罪戾者爲是乎。今之言遷幸者。猶前日之言和議可行者也。今日言不可遷者。猶前日之言和議不可行者也。惟陛下孰思而審用之。且京師二百年積累之基業。奈何輕棄。以遺敵國乎。詔遣官迎奉六宮。往金陵。澤又上疏曰。京師天



下之腹心也。兩河雖未安寧，特一手臂之不伸耳。今遽欲去之，是並腹心而棄之矣。澤前後建議，輒爲黃潛善等所抑。每見澤奏疏，皆笑以爲狂。金將兀朮渡河，謀攻汴京。諸將請先斷河梁，嚴兵自固。澤笑曰：去冬金騎直來，正坐斷河梁耳。乃命部將劉衍趨滑，劉達趨鄭，以分敵勢。戒諸將極力保護河梁，以俟大兵之集。金人聞之，夜斷河梁遁去。二年，金人自鄭抵白沙，去汴京密邇，郤人震恐，僚屬入問計。澤方對客奕棋，笑曰：何事？張皇劉衍等在外，必能禦敵。乃選精銳數千，繞出敵後，伏其歸路。金人方與衍戰，伏兵起，前後夾擊之。金人果敗去。東京山東盜起，執政謂其多以義師爲名，請下令止勤王。澤疏曰：自敵圍京城，忠義之士憤懣奮激，越數千里爭先勤王。當時大臣無遠識大略，不能撫而用之，使之飢餓困窮，弱者填溝壑，強者爲盜賊。此非勤王者之罪，乃一時措置乖謬所致耳。今河東西不從敵國，而保山砦者，不知其幾。諸處節義之夫，自鯨其面而爭先救駕者，復不知其幾。此詔一出，臣恐草澤之士一旦解體，倉卒有急，誰復有願忠効義之心哉？王策者本遼種，爲金將往來河上，澤擒之，解其縛坐堂上，語之曰：契丹本宋兄弟，國今女真辱吾主，又滅而國，義當協謀雪恥。策感泣願効死。澤因問敵國虛實，盡得其詳，遂決爲大舉之計。乃召諸將謂曰：汝等素有忠義之心，當協謀勦賊，期還二聖，以立大功。言訖泣下。諸將皆泣聽命。金人戰不利，悉引兵去。澤又上疏曰：天下之事見機而爲，待時而動，則事無不成。今收復伊洛，而金人渡河，捍蔽滑臺，而敵國屢敗。山東河北山砦義民，引領舉踵，日望官兵之至，以幾以時而言之，中興之兆可見。而金人滅亡之期，可必在陛下見幾乘時而已。澤屢敗金人，威聲日著，北方聞其名，常尊憚之。對南人言，必

曰宗爺爺。澤又疏言。丁進數十萬衆。願守護京城。李成願扈從還闕。卽渡河討賊。楊進等兵百萬。亦願渡河。同致死力。臣聞多助之至。天下順之。陛下及此時還京。則衆心翕然。何敵國之足憂乎。上乃降詔。擇日還京。後不果。澤前後請上還京二十餘奏。皆爲潛善等所抑。憂憤成疾。疽發於背。諸將入問疾。澤矍然曰。吾以二帝蒙塵。積憤至此。汝等能殲賊。則我死無恨。衆皆流涕曰。敢不盡力。諸將出。澤歎曰。出師未捷。身先死。常使英雄淚滿襟。翌日風雨晝晦。澤無一語及家事。但連呼過河者三而薨。都人號痛。遣表猶贊上入京。

斷曰

宗澤將軍。天生忠勇。兩河破殘。單騎往董。固守不移。城池復甞。金人南來。神弓力猛。縱擊直前。斬首成塚。康王使金。請毋覆踵。京師入援。兵須速擁。迭戰十二。捷報洵洵。奈何朝廷。和議受哄。二帝蒙塵。江山失統。帝及康王。已非英種。再相權奸。惟貪榮寵。澤雖英雄。難回懵懂。望駕還京。首猶南拱。憂憤發疽。誰爲一捧。連呼過河。誰爲一動。每一悲思。淚如泉湧。

# 岳飛

岳飛字鵬舉。相州湯陰人也。少負氣節。家貧力學。尤好左氏春秋。孫吳兵法。生有神力。未冠。挽弓三百斤。弩八石。學射于周同。盡其術。能左右射。同死。朔望設祭于其家。父義之曰。汝爲時用。其殉國死義乎。真定。宣撫劉韜募敢死士。飛應募。時相有劇賊陶俊。賈進和。飛請百騎滅之。先遣卒僞爲商人入賊境。賊掠以充部伍。飛遣百人伏山下。自領數十騎逼賊壘。賊出戰。飛佯北。賊來追之。伏兵起。先所遣卒擒俊及進和以歸。嘗從劉浩解東京圍。與敵相持於滑南。領百騎習兵河上。敵猝至。飛麾其徒曰。敵雖衆。未知吾虛實。當及其未定擊之。乃獨馳迎敵。有梟將舞刀而前。飛斬之。敵遂大敗。遷秉義郎。宗澤見而奇之。曰。爾勇智才藝。古良將不能過。然好野戰。非萬全計。因授以陣圖。飛曰。陣而後戰。兵法之常。運用之妙。存乎一心。澤是其言。康王卽位。飛上書數千言。大略謂黃潛善。汪伯彥奉車駕日。益南。恐不足繫中原之望。願陛下乘敵穴未固。親率六軍北渡。則將士作氣。中原可復。書聞。以越職奪官歸。詣招討使張所。所待以國士。因問曰。汝能敵幾何。飛曰。勇不足恃。用兵在先定謀。變枝曳柴以敗荆。莫敖采樵以致絞。謀定故也。所矍然曰。君殆非行伍中人。借補武經郎。命從王彥渡河。擊金人。至新鄉。金兵盛。彥不敢進。飛獨引所部。鏖戰奪其纛而舞。諸軍見而爭奮。遂拔新鄉。翌日。戰候兆川。又敗之。夜屯石門山下。或傳金兵復至。一軍皆驚。飛揣

知其不來。堅臥不動。金兵卒不來。食盡。走彥壁乞糧。彥不許。飛引兵益北。戰于太行山。擒金將拓拔耶烏。居數日。復遇敵。飛單騎馳丈八鐵鎗刺殺黑風大王。敵衆敗走。飛自知與彥有隙。復歸宗澤。澤卒杜充代之。與金人大戰汜水關。射殪金將。大破其衆。駐軍竹蘆渡。與敵相持。慮敵不易走。因選精銳三百伏前山下。令各以薪芻交縛而束。夜半。燕兩端而舉之。金人疑援兵至。驚而潰。三年。賊黃善曹成孔彥丹等合衆五十萬。薄南薰門。飛所部僅八百。衆懼不敵。飛曰。吾爲諸軍破之。左挾弓。右連矛。橫衝其陣。大敗之。杜充將還建康。飛曰。中原地尺寸不可棄。今一舉足。此地非我有也。他日欲復取之。非數十萬衆不可。充不聽。遂與俱歸。師次鐵路步。遇賊張用。至六合。遇賊李成。與戰皆敗之。成奔江西。時命充守建康。金人與成合窺烏江。充閉門不出。飛泣請視師。充竟不出。金人遂由馬家渡渡江。充遣飛等迎戰。諸將皆潰。飛獨力戰。會充降金。諸將多行剽掠。惟飛軍秋毫無犯。兀朮趨杭州。飛邀擊至廣德境中。六戰皆捷。擒其將王權。俘簽軍首領四十餘。察其可用者。結以恩遣還。令夜斫營縱火。飛乘亂縱擊。大破之。金兵相謂曰。此岳爺爺軍。爭來降附。兀朮趨建康。飛設伏牛首山待之。又令百人黑衣混金營中擾之。金兵驚自相擊。兀朮次甯灣。飛以騎三百步二千馳至新城。大破之。兀朮奔淮西。遂復建康。飛因奏建康爲要害之地。宜選兵固守。仍益兵守淮。拱護腹心。帝嘉納。兀朮歸。飛邀擊於靜安。又敗之。紹興元年。張俊請飛同討李成。時成將馬進犯洪州。連營西山。飛曰。賊貪而不慮後。若以騎兵自上流絕生米渡。出其不意。破之必矣。因自爲先鋒。重鎧躍馬。潛出賊右突其陣。所部從之。進大敗。走筠州。飛抵城東。賊出城布陣。十五里。飛設伏。以紅羅爲

幟上刺岳字。選騎二百隨幟而前。賊易其少薄之。伏發。賊敗走。飛使人呼曰：「不從賊者坐吾不殺汝。坐而降者八萬餘人。」成聞進敗。自引兵十餘萬來。遇于樓子莊。飛與戰。又大敗而追之。進成走蘄州。降僞齊。張用寇江西。用亦相人。飛以書諭之曰：「吾與汝同里。南董門鐵路步之戰。皆汝所悉。今吾在此。欲戰則出。不戰則降。用得書曰：『果吾父也。』遂降。江淮平。二年。賊曹成擁衆十餘萬。據道賀二州。詔付飛金字牌黃旗。命招成。成聞飛將至。驚曰：「岳家軍來。」卽分道而遁。飛至茶陵。知成遁不從招。因上奏曰：「比年多命招安。故爲盜者力強。則肆暴力。屈則就招。苟不略加勦除。蠱起之衆。未可遽殄。」上許之。飛入賀州境。得成諜者。縛之帳下。飛出帳調兵食。吏曰：「食盡矣。奈何？」飛佯曰：「姑反茶陵。已而顧諜。若失意狀。頓足而入。陰令逸之。諜歸告成。成大喜。期翌日來追。」飛命士蓐食。潛趨繞嶺。未明。已至太平場。破其砦。成據險拒飛。飛揮兵掩擊。賊大潰而成走。飛因謂張憲曰：「成黨散去。追而殺之。則脅從者可憫。縱之則復聚爲盜。今遣汝等誅其魁。而撫其衆。慎勿妄殺。累主上保民之仁。」於是憲自賀連沿道招降二萬餘人。進兵追成。成走宣撫司降。嶺表平時。虔吉盜連兵寇掠。帝命飛平之。飛至虔。賊彭友躍馬迎戰。飛麾兵卽馬上擒之。賊衆驚呼。丐命。飛令勿殺。受其降。帝有密旨。令飛屠虔城。飛請誅首惡而赦脅從。帝因曲赦之。人感飛德。繪像祠之。秋入見。帝手書精忠岳飛。自製旗以賜之。先是李成使金人入侵。又親趨兩浙與楊么會。飛因上奏。襄陽六郡爲恢復中原基本。今當先取六郡。使李成遠遁。然後加兵湖湘。以殄羣盜。因渡江。顧中流而誓曰：「不擒賊不涉此江。」既至襄陽。李成迎戰。左臨襄江。飛笑曰：「步兵利險阻。騎兵利平曠。」成左列騎江岸。右列卒平地。雖衆

十萬何能爲。舉鞭指王貴曰。爾以長鎗步卒擊其騎兵。指牛皐曰。爾以騎兵擊其步卒。既合戰。馬應鎗斃。後騎皆入江。步卒死者無數。成夜遁。遂復襄陽。既而又復鄧州。帝聞之喜曰。吾但知岳飛行軍有紀律。不知其能破敵如此。飛又復唐州。襄漢平。又擊走劉豫兀朮。而廬州平。因命招捕楊么。飛所部皆西北人。不習水戰。飛曰。兵何常。顧用之何如耳。先遣使招諭之。賊黨黃佐降。飛表授佐武義大夫。單騎按其部。拊佐背曰。子知順逆者。果能立功。封侯豈足道。欲復遣子至湖中。視其可乘者擒之。可勸者招之。如何。佐感泣。誓以死報。時張浚以都督軍事至潭。參政席益與浚語。疑飛玩寇。欲以聞。浚曰。岳侯忠孝人也。且兵有深機。胡可易言。益慙而止。黃佐既受飛命。因襲周倫砦。殺倫。擒其統制陳貴等。飛上其功。遷武功大夫。會詔浚還防秋。飛袖小圖示浚。浚欲俟來年議之。飛曰。已有定畫。都督能少留。不八日可破賊。浚曰。何言之易。飛曰。王四廂以王師攻水寇則難。飛以水寇攻水寇則易。水戰我短彼長。以所短攻所長所以難。若因敵將用敵兵。奪其手足之助。離其腹心之託。使之孤立。而後以王師乘之。八日之內當俘諸賊。浚許之。飛遂如鼎州。黃佐招楊欽來降。飛喜曰。楊欽驍勇。既降。賊腹心潰矣。表授欽武義大夫。禮遇甚厚。欽又說余端劉先等來降。又復入湖。夜掩賊營。降其衆數萬。么仍負固不服。方浮舟湖中。以輪激水。其行如飛。旁置檣竿。官舟迎之。輒碎。飛伐君山木爲巨筏。塞諸溝汊。以腐木亂草浮上流而下。擇水淺處。遣善罵者挑之。日行且罵。賊怒來追。則草木壅積。舟輪礙難行。飛亟遣兵擊之。賊奔港中。爲筏所拒。官軍乘筏。張牛革以蔽矢石。舉巨木撞其舟。舟盡壞。么投水。牛皐擒斬之。飛入賊壘。餘賊驚曰。何神也。俱降。飛親行諸砦慰撫之。

縱老弱歸田。籍少壯爲軍。果八日而賊平。浚歎曰。岳侯神算也。初賊恃其險。曰。欲犯我者。除是飛來。至是人以其言爲讖。未幾居母憂。降制起復。飛扶柩還廬山。連表乞終喪不許。屢詔趨起。乃就軍。旣而從幸建康。詔以王德。鄴。瓊兵隸于飛。且諭德等聽飛號令。如朕親行。飛數見帝。論恢復之略。帝答曰。有臣如此。朕復何憂。進止之機。朕不中制。又召至寢閣。命之曰。中興之事。一以委卿。飛方圖大舉。會秦檜主和。遂不以德。瓊兵隸於飛。詔詣都督府與張浚議事。浚謂飛曰。王德。淮。西軍所服。浚欲以爲都統。而命呂祉。督府參謀。領之如何。飛曰。德與瓊素不相下。一旦握之在上。則必爭。呂尙書不習軍旅。恐不足服衆。浚曰。張宣撫如何。飛曰。暴而寡謀。尤瓊所不服。浚曰。然則楊沂中爾。飛曰。沂中視德等耳。豈能馭此軍。浚斲然曰。浚固知非太尉不可。飛曰。都督以正問飛。飛不敢不盡其愚。豈以得兵爲念耶。卽日上章乞解兵柄。終喪制以張憲攝軍事。步歸廬。母墓側。帝累詔趨飛還職。飛力辭。又詔幕屬造廬以死請。凡六日。飛始還朝。待罪。帝慰遣之。未幾。鄴。瓊叛。浚始悔。飛復奏願進屯淮甸。伺便擊瓊。不許。飛知劉豫結粘罕而兀朮惡。因思劉豫可以間而動。會軍中得兀朮諜者。飛佯責之曰。汝非吾軍人。張斌耶。吾向遣汝至齊。約誘致四太子。汝往不復來。吾繼遣人問。齊已許我。今各以會合寇。江爲名。致四太子。清河。汝所持書。竟不至。何背我耶。諜冀緩死。卽詭服。乃作蠟書。言與劉豫同謀。兀朮事。因謂諜曰。吾今貸汝。復遣至齊。問舉兵期。剗股納書。戒勿泄。諜歸以書示兀朮。兀朮大驚。馳白其主。遂廢豫。飛復請乘廢豫之際。搗其不備。長驅以取中原。不報。十年。金人攻亳。劉錡告急。命飛馳援。因賜札曰。設施之方。一以委卿。朕不遙度。飛先遣張憲。姚政。馳赴之。後

乃遣王貴、牛臯等分布經略西京、汝、鄭諸郡。又命梁興渡河，糾合忠義社河東北州縣。又遣兵東援劉錡。西援郭浩，自以其軍長驅以闚中原。未幾，所遣諸將相繼奏捷。大軍在穎昌，諸將分道出戰。飛自以輕騎駐郟城，兵勢甚銳。兀朮大懼，會龍虎大王曰：「諸帥易與，獨飛不可當。欲誘致其師，并力一戰，中外聞之，俱大懼。」詔飛審處自固。飛曰：「金人伎窮矣。」乃日出挑戰，且罵之。兀朮怒，合龍虎大王、蓋天大王與韓常之兵逼郟城。飛遣其子雲領騎兵直貫其陣，戒之曰：「不勝先斬汝。」雲鏖戰數十合，賊屍布野。初，兀朮有勁軍，皆重鎧，貫以韋索。三人爲聯，號拐子馬。官軍不能當，是役也。以萬五千騎來，飛戒士卒以麻扎刀入陣，勿仰視。第斫馬足，拐子馬相連，一馬仆，二馬不能行。官軍奮擊，遂大敗。兀朮大慟曰：「自海上起兵，皆以此勝。今已矣。」方郟城再捷，飛謂雲曰：「賊屢敗，必還攻穎昌。汝宜速援王貴。」既至，兀朮果至。雲復大敗之。兀朮遁去。梁興會太行忠義及兩河豪傑等，亦屢戰皆捷。中原大震。飛因進軍朱仙鎮，距汴梁四十五里。與兀朮對壘而陣。遣驍將以背嵬騎五百奮擊，大破之。兀朮遁還汴京。是時磁相等境，皆期日興兵與官軍會。其所揭旗以岳字爲號。父老百姓爭挽車牽牛，載糗糧以餽義軍。頂盆焚香迎候者，充滿道路。自燕以南，金號令不行。兀朮欲簽軍以抗飛，河北無一人從者。乃歎曰：「自我起北方以來，未有如今日之挫衄。」金帥烏陵思謀及崔慶等皆次第來降。將軍韓常亦欲以五萬衆內附。飛大喜，語其下曰：「直抵黃龍，與諸君痛飲耳。」方指日渡河，而秦檜欲畫淮以北棄之。遂降詔班師。飛奏金人銳氣喪盡矣。棄輜重疾走渡河。豪傑向風，士卒用命。時不再來。機難輕失。檜知飛志銳不可回，一日奉十二金字牌，詔飛班師。飛憤惋泣下，東向再



拜曰。十年之力。廢于一旦。飛班師。民遮道慟哭。訴曰。我等戴香盆運糧草以迎官軍。金人悉知。相公去。我輩無噍類矣。飛亦悲泣。取詔示之。吾不得擅留。因留五日以待其徙。從而南者如市。又亟奏以漢上田處之。方發。方兀朮棄汴去。有書生叩馬曰。太子毋走。岳少保且退矣。兀朮曰。岳少保以五百騎破吾十萬京。城日夜望其來。何謂可守。書生曰。自古未有權臣在內。而大將能立功於外者。岳少保且不免。況欲成功乎。兀朮悟。遂留。飛既歸。所得州縣旋復失。飛力請解兵柄。不許。既而金兵分道渡淮。帝趨飛應援。飛師至廬州。金兵望風而遁。兀朮破濠州。楊沂中遇伏而敗。帝命飛救之。金人聞飛至。又遁。兀朮乃遺檜書曰。汝朝夕以和請。而岳飛方爲河北圖。必殺飛。始可和。檜亦以飛不死。終梗和議。己必及禍。故力謀殺之。乃使方俟高何鑄羅汝楫。交章彈論飛。又諭張俊令劫王貴。誘王俊誣告張憲謀還飛兵。檜遣使捕飛父子。證張憲事。使者至。飛笑曰。皇天后土可表此心。初命何鑄鞠之。飛裂裳以背示鑄。有盡忠報國四字。深入膚理。既而閱實無左驗。鑄明其無辜。改命方俟高。高誣飛與憲書。令虛申探報以動朝廷。言其書已焚。飛繫獄兩月。無可證者。又逼孫革等誣飛受詔逗留。命元龜年取行軍時日雜定之。傳會成獄。歲暮獄不成。檜手書小紙付獄。卽報飛死。時年三十九。雲棄市。籍家資徙嶺南。金人所畏服者惟飛。至以父稱之。聞其死。酌酒相賀。飛至孝。母死。水漿不入口者三日。家無姬侍。吳玠素服飛。願與交歡。飾名姝遺之。飛曰。主上宵旰。豈大將安樂時。卻不受。帝欲爲飛營第。飛辭曰。敵未滅。何以家爲。或問天下何時太平。飛曰。文臣不要錢。武臣不惜死。天下太平矣。孝宗詔復飛官。以禮改葬。追封鄂王。

斷曰

岳侯忠勇貫絕古今。雖好野戰。妙在一心。賊五十萬。八百立勳。中原浪棄。兀朮南侵。牛首敗走。新城又奔。李成之討。自洪至筠。不從者坐。招降賊人。分道而遁。蓋見岳軍。么湖中破。彭馬上擒。旣而北伐。中原直臨。刀斬馬足。拐子敗羣。賊屍布野。積如獸禽。兀朮大慟。欲遁還金。書生點破。內有權臣。死且不免。功又何論。其言果應。遺恨至今。

韓世忠

韓世忠字良臣。延安人也。鷲勇絕人。年十八。以勇敢應募。西夏騷動。世忠斬關殺敵將。擲首陣外。夏人大敗去。俄復出。世忠顧一騎士銳甚。問爲誰。或曰。監軍駙馬兀朮也。遂躍馬斬之。敵衆復大潰。方臘反。江浙震動。世忠以偏將從王淵討之。次杭州。賊掩至。勢張甚。諸將惶怖無策。世忠以兵二千。北伏關壕。賊遇伏。發蹂亂擊之。賊敗而遁。淵歎曰。眞萬人敵也。時有詔。能得臘首者。授兩鎮節鉞。世忠窮追至睦州清溪洞。賊深據巖屋爲三窟。諸將莫知所入。世忠潛行溪谷。問野婦得徑。卽挺戈直前。踰險擣其穴。格殺數十人。擒臘以出。從宣撫李彌大討山東賊。追擊至臨淄河。兵不滿千。分爲四隊。布鐵蒺藜。自塞歸路。令曰。進則勝。退則死。走者令後隊勦殺。於是皆死戰。破之。乘勝追至宿遷。賊尙萬人。方擁子女。椎牛縱酒。世忠單騎夜造其營。呼曰。大軍至矣。速束戈卷甲。吾能保全汝。立功名。賊駭慄請命。因跪進牛酒。世忠下馬解鞍。飲啖之盡。於是衆悉就降。黎明見世忠軍不至。始大悔失色。然無及矣。扈從統制苗傅。劉正彥作亂。劫帝傳。

位於皇子塹。張浚等在平江議討之。知世忠至。更相慶慰。世忠聞報大慟。舉酒酹神曰。誓不與此賊共戴天。士卒皆奮。因見浚曰。今日大事。世忠願以身任之。公無憂。卽欲進兵。浚曰。投鼠忌器。事不可急。急則恐有不測。已遣馬轡甘言誘賊矣。旣而世忠進兵至秀州。稱病不行。造雲梯。治器械。傅等始懼。初傅與正彥聞世忠來。檄以其兵屯江陰。世忠以好語報之。且言所部殘零。欲赴行在。傅等大喜許之。時世忠妻梁氏及子亮皆爲傅所質。防守甚嚴。爲朱勝非所紿。白太后遣還世忠。冀其勤王。未幾明受詔至。世忠乃曰。吾知有建炎。不知有明受。斬其使。取詔焚之。進兵益急。傅等大懼。因使賊將苗翊馬柔吉負山阻河爲陣。中流置鹿角以梗行舟。世忠舍舟力戰。軍少卻。世忠復舍馬操戈而前。令將士曰。今日當以死報國。而不被數矢者皆斬。於是士卒用命。賊列神臂弩。持滿以待。世忠瞋目大呼。挺刃突前。賊辟易。矢不及發。遂敗。傅正彥擁精兵二千。開湧金門以遁。世忠馳入。帝步至宮門。握世忠手慟哭曰。中軍吳湛佐逆爲最。尙留朕肘腋。能先誅乎。世忠卽謁湛。握手與語。折其中指戮於市。又自衢信追擊至漁梁。皆擒而伏誅。帝手書忠義二字。揭旗以賜。兀朮將入侵。帝召諸將問移蹕之地。世忠曰。國家已失河北山東。若又棄江淮。更有何地。於是以世忠爲浙西制置使。守鎮江。旣而兀朮分道渡江。諸屯皆敗。世忠自鎮江還保江陰。杜充以建康降敵。兀朮自廣德破臨安。帝如浙東。世忠乃以前軍駐青龍鎮。中軍駐江灣。後軍駐海口。欲俟敵歸邀擊之。會上元節。就秀州張燈高會。忽引兵趨鎮江。及金兵至。則世忠軍已先屯焦山寺矣。兀朮遣使通問。約日大戰。許之。戰將十合。梁夫人親執桴鼓。金兵終不得渡。請盡歸所掠假道。不許。請以名馬獻。又不聽。

撻辣在濰州。遣李鼐大一趨淮東以援兀朮。世忠與二人相持黃天蕩者四十八日。大一率鼐軍江北。兀朮軍江南。世忠以海艘進泊金山下。預以鐵綆貫大鈎。授驍健者。明日敵舟蹀而前。世忠分海舟爲兩道。出其背。每綆一綆。則曳一舟沉之。兀朮窮蹙。求會語。祈請甚哀。世忠曰。還我兩宮。復我疆土。則可以相全。兀朮語塞。又數日求再會。言不遜。世忠引弓欲射之。亟馳去。謂諸將曰。南人使船如使馬。奈何。募人獻破海舟策。閩人王某者。教其舟中載上平板鋪之。穴船板以擢槳。風息則出。江有風則勿出。海舟無風不可動也。又有獻謀者曰。鑿大渠接江口。則在世忠上流。兀朮一夕潛鑿渠三十里。次日風止。我軍帆弱不能運。命人以小舟縱火。矢下如雨。我軍多戰死。敵遂得絕江遁去。世忠收餘軍還鎮江。是役也。兀朮兵號十萬。世忠僅八千餘人。帝賜札褒美。建安范汝爲反。辛企宗等討捕未克。賊勢愈彊。詔世忠討之。世忠曰。建居閩嶺上流。賊沿流而下。七郡皆血肉矣。亟領步卒三萬。水陸並進。次劍潭。賊焚橋。世忠策馬先渡。師遂濟。賊盡塞要路。拒王師。世忠命諸軍偃旗仆鼓。徑抵鳳凰山。俯瞰城邑。設雲梯火樓。日夕並攻。賊震怖。莫測。五日城破。汝爲自焚。斬其弟岳吉以徇。民感更生。家爲立祠。捷聞。帝曰。雖古名將。何以加。世忠因奏。江西湖南寇賊尙多。乞乘勝討平。於是旋師永嘉。若將就休息者。忽由處信徑至豫章。連營江濱數十里。羣賊不虞其至。咸大驚。世忠遣人招之。廣西賊曹成以其衆降。得戰士八萬。遣詣行在。遂移師長沙。時劉忠有衆數萬。據白面山。營柵相望。世忠始至。欲急擊。宣撫使孟庾不可。世忠曰。兵家利害。非參政所知。請期半月。効捷。遂與賊對壘。奕棋張飲。堅壁不動。衆莫測。乃夜伏精兵二千於白面山。與諸將拔營而進。賊方

迎戰。所伏兵已馳入中軍。奪望樓。植旗蓋。傳呼如雷。賊回顧驚潰。麾將士夾擊。遂大破之。斬忠。湖南悉平。師駐鎮江。金人與劉豫合兵入侵。世忠親提兵駐大儀。當敵。會遣魏良臣使金。世忠撤炊爨。紿良臣有詔移屯守江。良臣疾馳去。世忠度良臣已出境。卽令軍中曰。視吾鞭所向。於是勒五陣。設伏二十餘所。約聞鼓卽起擊。良臣至金。金人問王師動息。良臣具以所見對。金人聞世忠退。喜甚。引兵至江口。別將撻孛也擁鐵騎過五陣東。世忠傳小麾鳴鼓。伏兵四起。旗色與金人旗雜出。金軍亂。我軍迭進。背嵬軍各持長斧。上撻人胸。下斫馬足。敵被甲陷泥淖。世忠麾勁騎四面蹂躪。人馬俱斃。遂擒撻孛也等二百餘人。世忠復親追至淮。金人驚潰。相蹈藉溺死甚衆。捷聞。羣臣入賀。帝曰。世忠忠勇。朕知其必能成功。自建炎以來。將士未嘗與金人迎敵。今世忠連戰以挫其鋒。論者以爲中興武功第一。六年授武寧安化軍節度使。世忠至。披草萊。立軍府。與士同力役。夫人梁氏親織蒲爲屋。將士有怯戰者。世忠遣巾幘婦人粧以恥之。故人奮厲。撫集流散。通商惠工。山陽遂爲重鎮。劉豫兵數入寇。輒爲世忠所敗。七年。築高郵城。民益安之。初。世忠移屯山陽。遣間結山東豪傑。約以緩急爲應。宿州馬秦及太行羣盜多願奉約束者。金人廢劉豫中原震動。世忠謂機不可失。請全師北討。爲恢復計。會秦檜主和議。命世忠徙屯鎮江。世忠言。金人詭詐。恐以計緩我師。乞留此師以蔽江淮。又力陳和議之非。慷慨激切。帝優詔褒答。後金果渝盟。咸如其言。金使蕭哲來。以詔諭爲名。世忠聞之。上言。金人欲以劉豫相待。則舉國士大夫盡爲陪臣。恐人心離散。士氣凋沮。請馳驛面奏。不許。旣而伏兵洪澤鎮。將殺金使。不克。十年。世忠圍淮陽。金人來救。世忠迎擊于泇口鎮。

敗之。又遣解元擊金人于潭城。皆捷。世忠在楚州十餘年。兵僅三萬。而金人不敢犯。世忠既不以和議爲然。爲檜所抑。諷言者論之。世忠連疏乞解樞柄。復上表乞骸。罷爲醴泉觀使。封福國公。節鉞如故。自此杜門謝客。絕口不言兵。時跨驢攜酒。從一二奚童縱游西湖。以自樂。平時將佐罕見其面。顯仁皇后自金還。世忠詣臨平朝謁。后在北方聞其名。慰問者良久。二十一年八月薨。孝宗朝追封蘄王。

斷曰

韓公世忠戰有大力。萬衆之中。躍馬斬敵。方臘反時。詔求甚急。踰險擒之。有如拾級。討賊山東。單騎夜入。連呼大軍。賊降不及。苗劉劫君。韓聞大泣。卽刻進兵。誅奸肘腋。兀朮再侵。帝思移蹕。河北山東。國家已失。再棄江淮。身于何立。死守鎮江。不容歸跡。求乞甚哀。愈加攻擊。窮困蕩中。四十八日。天不絕彼。鑿渠風息。江西湖南。寇賊如織。乘勝平之。無不盡克。帝論武功。中興第一。權檜不容。乞歸自適。

張俊

張俊字伯英。鳳翔府成紀人。好騎射。負才氣。年十六爲三陽弓箭手。屢立戰功。金人圍汴京。俊勒兵勤王。高宗時爲大元帥。見俊英偉。擢元帥。後軍統制。會有人自汴齎蠟。詔命高宗以兵付副帥。還京。高宗問大計。俊曰。此令人詐謀耳。今大王居外。此天授。豈可徒往。高宗許之。旣而汴京破。二帝北遷。俊懇辭勸進。曰。大王皇帝親弟。人心所歸。當天下洶洶。不早正大號。無以稱人望。高宗泣涕不許。俊便道扈行至應天府。高宗始卽位。隨遣還京。迎隆祐太后。尋奉太后及六宮以歸。時江淮羣盜蜂起。俊討杜用于淮寧。趙萬

郭青于鎮江。陳通于杭州。蔣和尙等于蘭溪。皆平之。尋又破秀州。賊數萬。縛徐明斬之。進武寧軍承宣使。帝如揚州。召諸將議恢復。俊曰。今敵勢方張。宜且南渡。據江爲險。練兵政安人心。俟國勢定。大舉未晚。帝如臨安。後苗傅劉正彥作亂。俊時屯兵吳江縣。傅等矯詔加官調之。俊知其僞。拒不受。會韓世忠自海上來。俊借一軍與之。世忠爲前軍。俊以精兵翼之。戰于臨平。討平之。金人分兵深入攻臨安。帝如溫州。留俊於明州。以拒敵。帝賜親札曰。朕非卿則倡義誰先。卿捨朕則前功俱廢。宜戮力共捍敵兵。一戰成功。當封王爵。旣而金人三犯明州。雖互有勝負。然極力戰守。未嘗有失。未幾江浙羣盜蠭起。俊復奉詔討平之。紹興元年。帝至會稽。時金人殘亂之餘。孔彥舟據武陵。張用據襄陽。李成尤悍強。據江淮湖湘十餘州。連兵數萬。有席卷東南意。圍江州久未解。朝議遣將致討。俊慨然請行。時成黨馬進在筠州。豫章介江筠之間。俊聞命就道。急趨豫章。且曰。我已得洪州。破賊必矣。乃斂兵。若無人者。金鼓不動。令將士登城者斬。居月餘。進以大書牒來索戰。俊以細書狀報之。賊以俊爲怯。俊諜知賊怠。乃出賊不意。大戰敗之。追奔七十里。至筠州。旣復筠州。又進至樓子莊。賊黨商元據草山峽。陰設伏。俊遣步兵從間道直趨椒山。殺伏奪險。乘勝追至江州。成勢迫。絕江而遁。號俊爲張鐵山。旣復江州。而興國軍等處羣盜。聞俊兵至。皆遁去。俊因引兵渡江。至黃梅縣。親與成戰。成懲奉新失險之敗。據石幢坡。憑山以木石投人。俊先遣游卒進退。若爭險狀。以誑賊。俊親冒矢石。率衆攻險。賊衆懼而潰。馬進爲追兵所殺。成北走降劉豫。諸郡悉平。拜太尉。四年。金人與劉豫分道入寇。諜至。舉朝震恐。或請他幸。俊謂趙鼎曰。避將何之。惟向前進一步。庶可脫。遂改俊

爲淮西宣撫使。瀕江相距。逾月。敵不得入。敵將引去。俊乃謂王進曰。敵旣無留心。必徑渡淮去。可速及其半濟而擊之。進往。敵果北渡。遂薄諸淮。大破之。獲其魁程師回。張延壽以獻。旣而劉麟入寇。率兵十餘萬。犯濠壽。詔並以淮西屬俊。楊存中亦聽節制。與俊合兵拒敵。俊分遣存中等自定遠軍次越家坊。遇劉猊。左右軍擊走之。俊率大軍鼓行而前。至李家灣。遇猊。大兵與戰。殺獲略盡。降者萬餘人。猊僅以身免。拜少保。帝曰。卿議論持重。深達敵情。兼開挽強之士數萬。報國如此。朕復何慮。後俊與韓世忠入見。秦檜奏陛下倚此二大將。譬如兩虎。固當各守藩籬。使寇不敢近。帝曰。正如左右手。豈可一手不盡力耶。命俊自盱眙屯廬州。八年。金人請寢兵。許之。九年冬。金復渝盟。再破河南。圍順昌。命俊策應劉錡。俊督軍渡江。金人退。繼又分道來侵。俊收宿亳諸軍擊之。盡復衛真鹿邑等地。十年。鄺瓊在亳州。俊以大軍至城。都統制王德下符離。乘勝趨亳。與俊合。俊引軍入城。金人棄城遁。父老列香花迎俊。遂復亳州。進少師。自是金人凡入寇。皆爲俊等所敗。然俊知朝廷欲罷兵。首請納所統兵力。贊和議。與秦檜意合。言無不從。加少傅。封益國公。十二年。以御史江遯論之。罷爲統禮泉觀使。俊握兵最早。屢立戰功。與韓世忠劉錡岳飛並爲名將。世稱張韓劉岳岳飛冤獄。韓世忠救之。俊獨助檜成其事。心術之殊也遠哉。

斷曰

張俊用兵。戰功可數。二帝蒙塵。請王爲主。太后迎歸。已無北土。杜用淮侵。郭青鎮阻。陳通杭殘。蘭溪蔣  
柝。一一皆平。徐明斬捕。苗劉之誅。雖韓操斧。俊借一軍。亦云相輔。請討李成。先以怯誓。俟惰追奔。突強



如虎詣郡奏功。太尉受祐和議贊成。合檜心腑。武穆之冤。惜無一語。

### 劉錡

劉錡字信叔。德順軍人。節度使劉仲武第九子也。美儀狀。善射。聲如洪鐘。嘗從仲武征討。牙門水斛滿。以箭射之。拔箭水注。隨以一矢窒之。人服其精。高宗召見。奇之。特差爲隴右都護。與夏人戰。屢勝。夏人兒啼。輒怖之。曰。劉都護來。帝駐于江解。潛孔彥兩軍交鬪。俱罷。命錡兼將之。錡始能成軍。扈從赴金陵。十年。金人歸三京。乃以錡充東京副留守。節制馬軍。所部八字軍。纔三萬七千人。錡自臨安泝江絕淮。至渦口。方食。忽暴風拔坐帳。錡曰。此賊兆也。主暴兵。卽下令兼程而進。未至順昌三百里。金人果敗盟來侵。錡遂與將佐舍舟陸行。先趨城中。問知府陳規曰。城中有糧否。有則能與尹共守。規曰。有米數萬斛。錡曰。可矣。因遣騎促所部將士及老稚輜重。連夜至。及旦。報金錡已入陳。錡遂斂兵入城。爲守禦計。人心乃安。衆計事。皆曰。金兵不可敵也。請以精銳爲殿。令步錡遮。老小順流還江南。錡曰。吾本赴官留司。今東京雖失。幸全軍至此。有城可守。奈何棄之。吾意已決。敢言去者斬。惟部將許清議與錡合。錡大喜。鑿舟沉之。示無去意。寘家寺中。積薪於門。戒守者曰。脫有不利。卽焚吾家。毋辱敵手。乃分令諸將守諸門。再三鼓勵。於是軍中爭呼躍曰。平時人欺我八字軍。今日當爲國家破賊立功。未幾。金人圍順昌。錡豫于城下設伏。擒千戶阿黑等二人。詰之。知虜營白沙渦。距城三十里。錡夜遣千餘人擊之。連戰殺敵頗衆。旣而三路合兵薄城。錡令開諸門。金人疑不敢進。初。錡傅城築牛馬垣爲門。至是蔽門爲陣。金人縱矢。皆白垣端軼著於城。或止。

中垣上。錡用破敵弓翼以神臂強弩。自城上或垣中射敵。無不中。敵稍卻。復以步兵邀擊。溺死河者不可勝計。時順昌受圍已四日。金兵益盛。乃移砦于東村。距城二十里。錡遣驍將閻充募壯士五百人。夜斫其營。是夕天欲雨。電光四起。見辮髮者輒殲之。金兵退十五里。錡復募百人以往。或請啣枚。錡笑曰。無以枚也。命折竹爲器。如市兒吹以爲戲者。人持一以爲號。直犯金營。電所燭則奮擊。電止匿不動。敵衆大亂。百人聞吹器聲。卽聚。金人益不能測。終夜自戰。積屍盈野。退軍老婆灣。兀朮聞而自忤來。錡遣曹成等二人作間曰。汝遇敵則佯墜馬。爲敵所得。敵問我何如人。則曰太平邊帥子。喜聲伎。朝廷以兩國講和。使守東京。圖逸樂耳。已而二人果遇敵。被執。兀朮問之。對如前。兀朮喜曰。此城易破耳。卽置鵝車礮具不用。至城下。責諸將喪師。衆皆曰。南朝用兵非復昔比。元帥臨陣自見。錡遣耿訓以書約戰。兀朮怒曰。劉錡何敢與我戰。以吾力破爾城。直用靴尖趨倒耳。訓曰。太尉非但請與太子戰。且謂太子必不敢濟河。願獻浮橋五所。濟而大戰。兀朮曰。諾。乃下令明日府治會食。遲明。錡果爲五浮橋于潁河上。敵由之以濟。錡因遣人毒潁上流及草中。戒軍士雖渴死。毋得飲于河。敵嚴陣以待。諸酋各居一部。衆請先擊韓將軍。錡曰。擊韓雖退。兀朮精兵尙不可當。法當先擊兀朮。兀朮一動。則餘無能爲矣。時天大暑。敵遠來疲弊。錡士氣閒暇。敵晝夜不解甲。錡軍皆更番休食。牛馬垣下。敵人馬饑渴。食水草者輒病。往往困乏。方晨清氣爽。錡按兵不動。逮未申間。敵力疲氣索。忽遣數百人出西門接戰。俄以數千人出南門。戒令勿喊。但以銳斧犯之。士殊死戰。入其營。刀斧亂下。敵大敗。錡遣兵追之。死者萬數。方大戰時。兀朮以牙兵三千督戰。兵皆重鎧甲。號

鐵浮圖戴鐵兜牟。周匝綴長簷。三人爲伍。貫以韋索。每進一步。卽用拒馬擁之。官軍乃以槍標去其兜牟。大斧斷其臂。碎其首。敵又以鐵騎分左右翼。號拐子馬。皆女真所爲。號長勝軍。專以攻堅。自用兵以來。所向無前。至是亦爲鎬所殺。遂至大敗。棄屍斃馬。血肉枕藉。車旗器甲。積如山阜。兀朮寨營還汴。是役也。鎬兵不滿二萬。出戰僅五千。而金兵數十萬。營西北亘五十里。每暮鼓聲震山谷。營中譁譁。終夜不息。而鎬城中寂然無雞犬聲。以逸待勞。故能勝之。捷聞。帝喜甚。旣而洪皓在燕歸。密奏順昌之捷。金人震恐。燕之重寶珍器。悉徙而北。欲捐燕以南棄之。而王師亟還。自失機會。良可惜也。十一年。兀朮簽兩河兵謀再舉。乃詔大合兵於淮西以待之。金人攻廬和二州。鎬自太平渡江。據東關之險。兩戰皆勝之。行至柘臯。與金人夾石梁河而陣。河廣二丈。鎬命曳薪壘橋。須臾而成。遣甲士數隊踰橋。臥槍而坐。會楊沂中。王德田。師中。張子孟之軍俱至。是時兀朮以鐵騎十萬分爲兩隅。夾道而陣。王德薄其右隅。引弓射一人斃之。因大呼馳擊。諸將鼓譟。金人以拐子馬兩翼而進。楊沂中復以萬兵各持長斧奮擊之。敵大敗。鎬與德等追之。又敗之於東山。敵望見曰。此順昌旗幟也。卽退去。居數日。正議班師。而濠州告急。鎬俊沂中等急趨黃連埠。援之。去濠六十里。而南城已陷。沂中欲進戰。鎬謂俊曰。本救濠。今濠已失。不如退師據險。以爲後圖。諸將曰。善。三帥鼎足而營。或言敵兵已去。鎬又謂曰。敵得城而遽退。必有謀也。宣嚴備之。俊不從。命沂中與德將步騎六萬人直趨濠州。果遇伏敗還。鎬軍至藕塘方食。俊遽至曰。敵兵已近。奈何。鎬語俊無恐。請以步卒禦敵。宣撫試觀之。鎬麾下皆曰。兩大帥軍已渡。我軍何苦獨戰。鎬曰。順昌孤城。旁無赤子之助。提

兵不滿二萬。猶足取勝。況今得地利。又有銳兵耶。俄而俊至。曰。謀者妄也。錡與俊益不相下。一夕俊軍士縱火劫錡軍。錡擒十六人。梟首梁上。餘皆逸。錡見俊。俊怒曰。我爲宣撫。爾乃判官。何得斬吾軍。錡曰。不知宣撫軍。乃斬劫砦賊耳。俊曰。有卒歸言。未嘗劫砦。呼一人出對。錡變色曰。錡爲國家將帥。有罪。宣撫當言於朝。豈得與卒伍對事。長揖上馬去。已皆班師。俊沂中還朝。每言錡戰不力。秦檜主其說。遂罷宣撫判官。命知荆南府。後魏良臣言錡名將。不當久閒。乃命知潭州。加大尉。復帥荆南府。三十一年。金主亮調軍六十萬。自將南來。中外大震。時宿將無在者。乃以錡爲江淮制置使。節制逐路軍馬。錡引兵屯揚州。軍容甚肅。金人以氈裹船。載糧而來。錡使善沒者鑿沉其舟。金高景山攻揚州。錡遣員琦拒於皂角林。陷圍力戰。林中伏發。大敗之。斬景山俘數百人。捷奏。賜金五百兩。銀七萬兩。以犒師。錡病求解兵柄。留其姪劉汜以千五百人塞瓜州渡。又令李橫以八千人固守。詔錡專防江。錡遂還鎮江。時葉義問督師江淮。至鎮江。見錡病劇。因督兵渡江。衆皆以爲不可。義問強之。不得已而行。及金人以重兵逼瓜州。後軍王方死之。橫汜僅以身免。方諸軍渡江而北也。錡使人持黃幟登高山望之。戒曰。賊至舉白幟。合戰。舉二幟。勝則舉黃幟。是日二幟舉。踰時。錡曰。黃幟久不舉。吾軍殆矣。錡憤懣。病益甚。參軍虞允文自采石督舟師與金人戰。過鎮江。謁錡問疾。錡執允文手曰。疾何必問。朝廷養兵三十年。一技不施。而大功乃出一書生。我輩愧死矣。發怒嘔血數升而卒。贈開府儀同三司。錡慷慨深毅。有儒將風。金主亮之南也。下令有敢言錡姓名者。罪不赦。枚舉南朝諸將。問其下孰敢當者。皆隨姓名答如響。獨至錡。莫有應者。

斷曰

劉錡受命節制東京。軍名八字。三萬餘兵。絕淮而上。暴風勿驚。主有賊兆。金果敗盟。順昌既至。因趨入城。及旦敵合。百計戰爭。或伏擒敵。或夜斫營。或借電殲。或聚吹笙。使其不測。自戰屍橫。又示柔弱。令其驕盈。又毒水草。使其病生。晨涼不戰。午疲急征。外兵震攪。內寂無聲。故能大勝。捷奏帝廷。命謀再舉。羣帥列旌。順昌旗號。一見遠行。後屢合戰。或輸或贏。主謀不一。嘔血命傾。



# 廣名將傳卷十五

吳玠

吳玠字晉卿隴干人也。少知兵。善騎射。以良家子隸涇原軍。夏人犯邊。以功擢隊將。又從討方臘。破之。金人攻延安。經略王庶召曲端進兵。端不進。且曰。不如蕩其巢穴。攻其必救。遂攻蒲城。命玠攻華州。拔之時。張浚欲合五路兵與金人決戰。玠言宜各守要害。須其變而乘之。一戰可以成功。浚不聽。進兵富平。又會諸將議戰。玠曰。兵以利動。今地勢不利。未見其可。宜擇高阜據之。以備敵深入。諸將皆曰。我衆彼寡。又前阻葦澤。敵雖有騎不得施。何用他徙。已而敵驟興柴囊土。藉淖平行。進薄端營。軍遂大潰。五路皆陷。巴蜀大震。玠將散卒保散關。東和尚原。積粟繕兵列柵。爲死守計。或謂玠宜退守漢中。扼蜀中以安人心。玠曰。我保此。敵決不敢越我而進。懼我躡其後。是所以保蜀也。糧食雖不繼。鳳翔民耕穫者衆。若以恩義結之。彼自有糧助我。乃遣人詣鳳翔。告以恩德。並以重資遺之。使其預通金人消息。鳳翔民大悅。曰。我輩皆宋民。迫于虜勢。不得已耳。今吳將軍不棄我。我等當以死報。於是相與夜送芻糧二千餘斛助之。玠仍以金帛賞之。民得金帛益喜。輸者愈多。金人怒。伏兵渭河邀殺之。令保伍連坐。然民感玠恩德。冒禁如故。紹興元年。金將沒立自鳳翔。別將烏魯折合自階成出散關。約日會和尚原。烏魯折合先期至。陣北山索戰。玠命諸將堅陣待之。更戰迭休。山谷路狹多石。馬不能行。金人舍馬步戰。大敗。移砦黃牛。會風雨電。遂遁去。沒

立方攻箭箐關。玠復遣將擊退之。兩軍終不得合。張浚錄其功。拜明州觀察使。金人自起海角。狃于常勝。及與玠戰。輒敗。憤甚。謀必取玠。因會諸道十餘萬。造浮梁跨渭。自寶雞結連珠營。壘石爲城。夾澗與官軍相拒。十月。攻和尚原。玠命諸將選勁弓強弩。分番迭射。號駐隊矢。連發不絕。繁如雨注。敵稍卻。則以騎兵旁擊。絕其糧道。度其困且走。設伏以待。金兵至。伏發。衆大亂。縱兵夜擊。大敗之。兀朮中流矢。僅以身免。兀朮既敗。使將撒離喝爲陝西經略使。屯鳳翔。與玠相持。且令來窺蜀。第以璘守和尚原不得逞。將出奇取之。時玠在河池。遂用叛將李彥琪駐秦州。睨仙人關。以綴玠。復令游騎出熙河。以綴關師。古乃命撒離喝自商於直搗上津。取金州。竟長驅趨制洋漢。興元守臣劉子羽急以驛書招玠入援。玠遂自河池日夜馳三百里。以黃柑遺敵曰。大軍遠來。聊用止渴。撒離喝大驚。以杖擊地曰。爾來何速耶。遂大戰饒風嶺。金人披重鎧。登山仰攻。一人先登。二人擁後。先者旣死。則後者代攻。玠軍弓弩亂發。大石摧壓。如是者六晝夜。死者山積。而敵不退。募敢死士五千。將夾攻。會玠小校有得罪奔金者。導以祖溪間路出關背。乘高以瞰饒風。諸軍不支。遂潰。玠退保西縣。敵入興元。劉子羽退保三泉。玠走三泉會之。築渾毒山。以白固。未幾。金人北歸。玠急遣人邀于武休關。掩擊其後軍。墮澗死者以千計。金人始謀。本謂玠在西邊。故道險東來。不虞玠馳至。雖入三郡。而失不償得。進玠檢校少保。先是璘在和尙原。餉饋不繼。玠又謂去蜀遠。命璘棄之。經營仙人關。創築一壘。移原兵居之。至是。兀朮撒離喝及劉夔率十萬騎入侵。自鐵山鑿崖開道。循嶺東下。玠以萬人當其衝。璘率輕兵。由七方關倍道而至。與金兵轉戰七晝夜。始與玠合。敵首攻玠營。玠擊走。



又以雲梯攻壘壁。楊政以撞竿碎其梯。以長矛刺之。璘拔刀畫地。謂諸將曰。死則死此。退者斬。金分軍。兀朮陣于東。韓常陣于西。璘率銳卒。介其間。左縈右繞。隨機而發。戰久。璘軍少憊。急屯第二隘。金生兵踵至。人被重鎧。鐵鉤相連。魚貫而上。璘以駐隊矢。迭射。矢下如雨。死者屢積。敵踐而登。撒離喝駐馬四視曰。吾得之矣。翌日。命攻西北樓。姚仲登樓酣戰。樓傾。以帛爲繩。挽之復正。金人用火攻樓。以洒缶撲滅之。玠急遣田晟。以長刀大斧左右擊。明炬四出。震鼓動地。明日。大兵出。統領王喜。王武率銳士。分紫白旗入金營。金陣亂。奮擊射。韓常中左目。金人始宵遁。玠遣張彥。結橫山砦。王浚伏河池。扼歸路。又敗之。是役也。金自兀帥以下。皆攜孥來。劉夔乃豫之腹心。本謂蜀可圖。旣不得逞。又度玠終不可犯。則還據鳳翔。授甲士田爲久留計。自是不妄動。捷聞。屢遷。授檢校少師。玠與敵對壘。且十年。常苦遠餉勞民。屢汰冗員。節浮費。治屯田。歲收至十萬斛。又調戍兵。命梁洋守將治褒城廢壘。民知灌溉可恃。願歸業者數萬家。九年。遷四川宣撫使。遣內侍奉親札以賜。至則玠病已甚。扶掖聽命。帝聞而憂之。命守臣就蜀求善醫。且勅國公馳視。未至。玠卒于仙人關。年四十七。贈少師。賜錢三十萬。玠善讀書。凡往事可師者。皆錄座右。積久。牆牖皆格言也。用兵本孫吳。務遠略。不求近利。故能保必勝。御下嚴而有恩。待士虛心聽受。選用將佐。必視勞能爲高下。不以親故權貴撓之。玠卒。胡世將問玠所以制勝者。璘曰。璘從先兄有事西夏。每戰不過一進卻之頃。勝負輒分。至金人則更進迭退。忍耐堅久。非累日不決。勝不遽追。敗不至亂。與之角久。乃得其情。蓋金人弓矢不及中國之勁利。中國士卒不及金人之堅忍。吾嘗以長技相角於數百步外。彼固不能相及。故

每選據形使出銳卒更迭撓之使不得休暇以沮其堅忍之氣至決機于兩陣之間則璘有不能言者方富平之敗秦鳳皆陷金人一意睨蜀東南之勢亦急微玠身當其衝無蜀久矣故西人至今思之淳熙中追封涪王

斷曰

吳玠用兵大有方略屢言戰爭當以利作張浚不聽一敗勢弱急保散關爲蜀要着恩結鳳翔芻糧水若更戰迭休金兵屢卻遠遣黃柑令敵錯愕金人始謀謂玠西掠道險東來玠偏擁幕三郡雖侵失厚得薄用火攻樓酒佯撲剝分紫白旗金營橫虐射目韓常乘宵奔脫西蜀旣安玠病早惡爲國亡身英雄所樂

吳璘

吳璘字唐卿玠弟也從玠攻戰以箭箬關之功居多超遷統制又以守和尚原大敗金人兀朮中流矢遁去之功陞康州團練使至紹興三年玠敗于祖溪嶺時璘猶在和尙原玠命璘棄原別營仙人關以防金人深入四年兀朮撒離喝果以大兵十萬至關下璘自武階路入援先以書抵玠謂殺金平地闊遠前陣散漫須後陣阻隘然後可以必勝玠從之急修第二隘璘冒圍轉戰會于仙人關敵果極力攻第二隘諸將請別擇形勢以守璘奮曰兵方交而退是不戰而走也吾度此敵去不久矣諸君第忍之震鼓易幟血戰連日金人大敗自是數年不敢窺蜀時金人廢劉豫歸河南陝西地樓炤使陝以便宜欲命三帥分陝

而守以郭浩帥鄜延。楊政帥熙河。璘帥秦鳳。欲盡移川口諸軍於陝西。璘曰：「金人反復難信，懼有他變。今我移軍陝右，則蜀空虛，敵若自南山要我，陝右軍直擣蜀口，是不戰自屈矣。當且依山爲屯，控其要害，逮其情見力疲，漸圖進據。」炤從之。命璘與楊政兩軍屯內地保蜀。郭浩一軍屯延安以守陝。旣而胡世將至河池，璘見之曰：「金大兵屯河中府，止隔大慶一橋耳。騎兵疾馳，不五日至川口。吾軍遠在陝西，緩急不可追集，關隘不葺，糧道斷絕，此存亡之秋也。而朝廷恃和忘戰，且欲廢仙人關。璘家族固不足惜，如國事何？」世將遂抗疏，謂外固和好，宜內修守禦。於是璘僅以牙校三隊赴秦州，留大軍守階成山砦。戒諸將毋得撤備。十年，金人敗盟，撒離喝渡河入長安，趨鳳翔。陝右諸軍隔在敵後，遠近震恐，召諸將議，惟涇原帥田晟與楊政同至，參謀孫渥謂河池不可守，欲退保仙人原。璘厲聲折之曰：「儒語沮軍，可斬也。」璘請以百口保破敵。世將壯之，指所居帳曰：「世將誓死于此，乃命田晟以三千人迎敵。璘又遣姚仲拒于石壁砦，敗之。璘又以書遺金將約戰。金鶴眼郎君以三千騎衝璘軍，璘以驍騎擊走之。鶴眼入扶風，復攻拔之，獲三將及女真百十有七人，撒離喝怒甚，自戰百遁坊，列陣三十里。璘力戰破之。十一年，金統軍胡蓋與習不祝合軍五萬屯劉家園，璘請討之。世將問策，璘曰：「有新立鼻陣法，每戰以長槍居前，坐不得起，次最強弓，次強弩，跪膝以俟，次神臂弓，約賊相搏至百步內，則神臂先發，七十步強弓並發，次陣如之。凡陣以拒馬爲限，鐵鈎相連，俟其傷則更代之。遇更代，則以鼓爲節，騎兩翼以蔽於前，陣成而騎退，謂之疊陣。此古東伍令也。車戰餘意，無出于此。戰士心定，則能持滿，敵雖銳不能當也。及與二酋遇，遂用之。二酋老於兵，據

險自固。前臨峻嶺。後控臘家城。謂我必不敢輕犯。先一日。璘會諸將問所以攻。姚仲曰。戰于山上則勝。山下則敗。璘以爲然。乃告敵請戰。敵笑之。璘夜半遣仲及王彥啣枚截坡。約二將上嶺而後發火。二將至嶺。寂無人聲。軍已列畢。萬炬齊發。敵駭愕曰。吾事敗矣。及胡蓋出慶戰。璘以疊陣法更休遞戰。自輕裘駐馬。亟麾之士殊死鬪。金人大敗。降者萬人。胡蓋走保臘家城。璘圍而攻之。城垂破。朝廷以驛書詔璘班師。世將浩歎而已。明年。竟割和尚原以與敵。撤戍割地。皆秦檜主之也。此後和議方堅。而璘治軍經武。常如敵至。二十一年。金主亮叛盟渡淮。遣合喜以兵扼大散關。璘卽駐軍青野原。益調內郡兵分道而進。又移檄契丹。西夏及山東河北。聲金人之罪。以致討。金人據大散關。璘將姚仲與之相持六十日。不能破。乃舍鞏攻德順。璘遣子挺與敵戰于瓦亭。敗之。璘自將至城下。守陴者聞呼。相公來。觀望咨嗟。矢不忍發。璘按行諸屯。預治黃河戰地。斬不用命者。先以數百騎嘗敵。敵一鳴鼓。銳士空壁躍出。突璘軍。璘軍得先治地。無不一當十。至暮。璘忽傳呼某將戰不力。人益奮搏。敵大敗。奔入壁。黎明。師再出。敵堅壁不動。會天大風雷。金人拔營去。凡八日而克。所得輜重不計數。璘入城市不改肆。父老擁馬迎拜不絕。璘尋還河池。四月。原州受圍。璘命姚仲以德順之兵往探。璘自趨鳳陽視師。諸將雖力戰。敵攻益急。五月。仲與敵戰于原州之北嶺。敗績。璘亦無功還。因奪仲兵。欲斬之。或勸而止。璘策金人必再爭德順。亟馳至城下。而完顏悉烈等兵十餘萬果來攻。萬戶豁豁復領精兵自鳳翔繼至。璘築堡東山以守。敵極力爭之。殺傷大半。終不能克。時議者以爲兵宿於外。去川日遠。恐敵襲之。欲棄三路。遂詔璘退師。敵乘其後。璘將士死亡者甚衆。三路

復爲敵有。乾道元年詣闕。召見德壽宮。高宗見璘歎曰。朕與卿老君臣也。可數入見。璘頓首謝。及還鎮。兩宮宴餞甚寵。又解所佩刀賜之曰。異時思朕視此可矣。璘至漢中。修復褒城古堰。溉田數千頃。民甚便之。三年卒。贈太師。追封信王。璘剛勇喜大節。代兄爲將。守蜀餘二十年。隱然爲方面之重。高宗嘗問勝敗之術。璘曰。弱者出戰。強者繼之。高宗曰。此孫臏三駟之法。一敗而二勝也。嘗著兵法大略。謂金人有四長。我有四短。當取我之短。制彼之長。四長曰。騎兵曰堅忍。曰重甲。曰弓矢。吾集其番漢所長。兼收而並用之。以分隊制其騎兵。以番休迭戰制其堅忍。制其重甲。則勁弓強弩。制其弓矢。則以遠克近。以弱制強。布陣之法。則以步軍爲陣心。左右翼以馬軍爲左右助。距馬步兩陣之間。至帟撥增損之不同。則係乎臨機知兵者取焉。

斷曰

吳璘玠弟。戰功多利。散漫難攻。隘擊容易。立第二關。以張形勢。血戰破之。窺蜀無計。金人敗盟。衆欲退。避璘怒叱之。戰守兩濟。金屯劉園。璘請討致。疊陣攻之。以強乘蔽。再戰山上。敵憂敗斃。勢已垂危。班師。詔至秦檜爲奸。復主和議。戰勝轉驚。敗已成例。可惜英雄。空生其際。雖贈太師。不勝短氣。

李顯忠

李顯忠。初名世輔。綏德軍青澗人也。由唐以來。世襲蘇尾九族巡檢。初其母當產。數日不能免。有僧過門。曰。所育乃奇男子。當以劍矢。寘母旁。卽生。已而果生顯忠。立干葶。咸異之。年十七。隨父永奇。出入行陣。金

人犯鄜延。經略王庶命永奇募間者。得張琦。更求一人。顯忠請行。永奇曰。汝未涉歷。行必累琦。顯忠曰。顯忠年少。膽氣不小。必不累琦。遂與琦俱。有敵人夜宿陶穴。顯忠縋穴入。得十七人。皆殺之。取首二級。馬二匹。餘馬悉折其足。庶大奇之。補充隊將。由是始知名。金人陷延安。授顯忠父子官。永奇聚泣曰。我宋臣也。世襲國恩。乃爲彼用耶。會劉毅令顯忠帥馬軍赴東京。永奇密戒之曰。汝若得乘機。卽歸本朝。無以我故。二其志。事成。我亦不朽矣。顯忠至東京。劉麟喜之。授南路鈐轄。已而豫廢。兀朮以萬騎馳獵淮上。與顯忠獨立馬圍場間。顯忠戒吳俊往探淮水可渡馬處。欲執兀朮歸朝。俊還。顯忠馳問之。爲竹刺傷馬而止。兀朮授顯忠承宣使。知同州。顯忠至鄜省視。永奇教顯忠曰。同州入南山。乃金人往來驛路。汝可於此擒其酋。渡洛渭。由商虢歸朝。第報我知。我當以兵取延安而歸。顯忠赴同州郡。遣黃士成等持書由蜀至吳。報歸朝事。元帥撒離喝來同州。顯忠以計執之。馳出城至洛河。舟船後期不得渡。與追騎屢戰皆勝。顯忠憩高原。望追騎益多。乃與撒離喝折箭爲誓。不得殺同州人。不得害我骨肉。皆許之。遂推之下山崖。追兵追殺得免。顯忠攜老幼長驅而北。至鄜城縣。急遣人告永奇。永奇卽挈家出城。至馬翅谷口。爲金人所及。家屬二百口皆遇害。是日天昏大雪。延安人聞之。皆泣下。顯忠僅以二十六人奔夏國。夏人問故。顯忠泣具言父母妻子之亡。切齒疾首。恨不卽死。願得二十萬人。生擒撒離喝。取陝西五路歸于夏。顯忠亦得以報不共戴天之仇。夏主曰。爾能立功。則不靳借兵。時有酋豪號青面夜叉者。久爲夏國患。乃令顯忠圖之。請二千騎。晝夜疾馳。掩至其帳。擒之以歸。夏主大悅。卽出二十萬騎。以文臣王樞武臣夥訛爲陝西招撫使。

顯忠爲延安招撫使。顯忠引兵至延安。總管趙惟清大呼曰：「鄜延路今復歸宋矣。」已有赦書。顯忠與官吏觀赦書。列拜。顯忠大哭。衆皆哭。百姓哭聲未絕。顯忠乃以舊部八百餘騎。往見王樞。嚆諭之曰：「顯忠已得延安府。見講和赦書。招撫可以本部軍歸國。嚆訛不從。曰：『初經略乞兵來取陝西。今既到此。乃令我歸耶。』顯忠知勢不可。乃出刀斫嚆訛。不及。擒王樞縛之。夏人以鐵鶴子軍來。顯忠以所部拒之。馳揮雙刀。所向披靡。夏兵大潰。殺死蹂殘。無慮萬人。獲馬四萬匹。顯忠揭榜招兵。每得一人。與馬一匹。旬日間得萬人。皆驍勇少壯。乃擒害其父母弟姪者。皆斬于東城之內。行至鄜州。已有馬步軍四萬餘。撒離喝在耀州。聞顯忠來。一夕遁去。四川宣撫吳玠遣張振來撫諭云：「兩國見議和好。不可生事。可量引軍赴行在。遂在河池縣見玠。玠撫之曰：『忠義歸朝。惟君第一。至行在高宗。又撫勞再三。賜名加賚。兀朮犯河南。命顯忠與李貴同破靈璧縣。兀朮犯合肥。手詔以軍與張俊會。顯忠至孔城鎮。與敵戰。大敗之。兀朮謂韓常曰：『李世輔歸宋。不會立功。此人敢勇。宜且避之。』乃焚廬江而走。顯忠欲追之。與死戰。俊以奉旨監護。慮失顯忠。遂各以軍還。顯忠熟西邊山川險易。因上恢復策。忤秦檜意。會金使言顯忠私遣人過界。遂降官奉祠。臺州居住。二十九年。至是。金人渝盟。詔顯忠以本部捍禦。遣韋永春等以二百騎與金將小韓將軍兵五千人戰于大人洲。敗之。又增兵萬餘來戰。顯忠率騎軍出。自旦至午。氣百倍。以大刀斫敵陣。敵不能支。殺獲甚衆。擁入淮者不可計。金主亮犯淮西。朝廷命王權拒于合肥。權棄軍渡江。和州失守。金主統軍駐和之雞籠山。將濟采石。朝廷詔以顯忠代權。軍中大喜。於是有采石之捷。顯忠退軍沙上。得楊存中報。車駕至平江。

可速進兵。顯忠選銳士萬人渡江。盡復淮西州郡。軍至橫山澗。與金射鵬軍戰。敵兵敗走。金主亮切責諸將不用命。諸將弑之而還。是役也。顯忠所得一萬九千餘人。行賞有差。詔賜顯忠五子金帶。授顯忠淮南京畿等處招討使。孝宗卽位。賜田百畝。時金主雍新立。見山東河北豪傑蠶起。皆欲挈地還于朝。金主懼而亟請和。時張浚開都督府。命顯忠渡江督戰。乃自濠梁渡淮。至陟溝。蕭琦用拐子馬來拒。與戰敗之。琦復背城列陣。顯忠躬率將士鏖戰。琦敗走。遂拔靈壁。入城宣布德意。不戮一人。中原歸附者接踵。時邵宏淵圍虹縣未下。顯忠遣靈壁降卒開諭禍福。遂皆出降。宏淵恥功不自己出。又有降千戶訴宏淵卒奪其佩刀。顯忠立斬之。由是二將益不相睦。六月。兵薄宿州城。金人來拒。顯忠敗之。斬其首虜數千人。追奔二十餘里。宏淵至。謂顯忠曰。招撫真關西將軍也。顯忠閉營休士。爲攻城計。宏淵等不從。顯忠引麾下城。開北門。不踰時。拔其城。宏淵等殿後促之。乃始渡淮。登城。城中巷戰。又斬首虜數千人。遂復宿州。捷聞。授顯忠開府儀同三司。金帥孛撒自南京率部騎十萬來。晨薄城。列大陣。顯忠親率軍遇于南城。戰數十合。孛撒大敗。遂退走。翌日。敵益兵至。顯忠并力夾擊。宏淵按兵不動。顯忠獨與所部力戰百餘合。殺左翼都統及千戶萬戶。斬首虜五千餘人。俄增兵復來逼城。顯忠用克敵弓射卻之。宏淵顧衆曰。當此盛夏。搖扇于清涼。猶不堪。況烈日中披甲苦戰乎。人心遂搖。無復鬪志。至夜。中軍統制周宏鳴鼓大譟。陽爲敵兵至。與邵世雍劉旻名以所部兵遁。繼而左士淵李彥孚皆遁。顯忠移軍入城。金人乘虛復來攻城。顯忠竭力捍禦。斬首虜二千餘人。積尸與牛馬牆平。城東北角。敵兵二十餘人已上百餘步。顯忠取軍所執斧斫之。



敵始退卻。顯忠曰：若使諸軍相與犄角，自城掩擊，則敵兵可盡。金帥可擒，河南之地指日可復矣。宏淵又言：金添生兵二十萬來，倘我軍不返，恐不測生變。顯忠知宏淵無固志，勢不可孤立，歎咤曰：皇天未欲平中原耶？何阻撓若此？遂夜引還。至符離，師大潰，所喪軍資器械殆盡。幸而金不復南，顯忠以軍還。見浚，納印待罪，責授果州團練副使。潭州安置。後朝廷知其故，乃復召。除威武軍節度使。左金吾衛上將軍，賜第京師。上奇其狀貌魁傑，命繪像閣下。淳熙四年七月卒，贈開府儀同三司，諡忠襄。

斷曰

顯忠丈夫，生而不誣，殺人陶穴，膽勇已粗。陷金授職，泣思改圖。會遣軍赴，恰與意符。報父潛走，父緩彼誅。切齒致恨，投夏訴辜。爲擒青面，借兵以扶。害父母者，立擒以屠。適值有赦，歸宋如初。高宗加賚，命備戈爰兀朮來犯，一戰幾俘。相戒避去，壯志可舒。上策忤檜，奉祠閒居。二十九載，金盟復渝。大戰大戮，小戰小驅。牽連卽敗，實衆所拘。丈夫至此，不負其軀。

楊存中

楊存中，代州崞縣人。本名沂，中字正甫。紹興間，賜今名。爲人沉鷲，嘗慨然語人曰：大丈夫當以武功取富貴，焉能俯首爲腐儒哉？因精孫吳兵法，善騎射。初隸張俊部曲，上問將於俊，俊以存中對。因召見，扈衛寢幄。劇賊李昱據任城，久不克。存中以數騎入擊，殺數百人。帝乘高望，見介冑盡赤，意其被重創，召視之，皆汚賊血。帝壯之，飲以酒，曰：酌此血，漢存中請復往。帝止之。存中曰：此賊膽碎，卽成擒矣。遂大破之，復任城。

建炎二年。討賊徐明于嘉興。先登城陷。主帥將屠城。存中力請止之。戮其渠魁而已。郡賴以全。紹興元年。從張俊討李成。諸將議欲分道進。存中曰。賊勢如此。兵分則力弱。又諸將位均勢敵。非招討督之。必不相持。守。俊然之。整軍至豫章。存中率兵數千。首破賊于玉隆觀。追至筠州。賊以衆十萬來援。夾河而營。存中謂俊曰。彼衆我寡。擊之常用奇。願以騎見屬。公以步兵居前。後俊從之。存中夜啣枚渡筠河。出西山。馳下擊賊。俊以步兵夾攻。俘八千人。諸將夜見存中曰。戰未休。降卒多。忽有變。奈何。非盡殲之不可。存中曰。殺降。吾不忍。諸將轉告俊。竟夜坑之。乘勝追至九江。成遂遁去。二年。進存中神武中軍統制。存中固辭曰。神武諸帥。如韓世忠。張俊。皆貴擁旄鉞。名望至重。如臣么麼。一旦位與之抗。實不自安。不許。時中軍卒不滿五千。疲癯者居半。存中請拘神武卒。借出于外者歸軍中。由是軍政寔修。劉猷入犯淮西。宣撫使劉光世欲棄廬州。退保太平。賊衆十萬。已次濠壽。時張浚視師。因命張俊拒之。又使存中往泗州與俊合。及至泗。則光世已捨廬去。浚使人諭之曰。一人渡江。卽斬以徇。光世不得已。還廬駐兵。與存中相應。賊先犯定遠縣。存中以兵二千襲敗于越家坊。旣而與猷兵遇藕塘。賊據山列陣。矢下如雨。存中急擊之。且使統制吳錫以勁騎五千突其陣。陣亂。存中鼓大兵乘之。自以精騎衝其脇。大呼曰。賊破矣。賊錯愕駭視。遂大敗。猷以首抵謀主李諤曰。適見髯將軍。銳不可當。果楊殿司也。卽以數騎遁去。餘黨萬人僵立失措。存中躍馬叱之。皆怖而降。劉麟在順昌。孔彥舟方圍光州。聞之。皆拔柴遁去。捷聞。帝喜。謂宰相執曰。卿輩始知朕得人也。十年。金人叛盟。取河南。命存中爲宣撫。引兵至宿州。金人詭令來告。敵騎數百屯柳子鎮。存中信之。留

王滋蕭保以千騎守宿。自將五百騎夜襲柳子鎮。黎明不見敵而還。金人以精兵伏歸路。存中知之。遂橫奔而潰。參議官不知存亡。以聞。朝廷震恐。既而存中自壽春渡淮歸泗。人心始安。十一年。兀朮恥順昌之敗。復謀來侵。詔大合兵於淮西以待之。於是存中以殿司兵三萬戍淮。與金人遇于柘臯。時張俊劉錡王德皆會集。金人以拐子馬翼而進。存中曰。敵恃弓矢。吾有以屈之。使萬人操長斧。如牆而進。諸軍鼓噪奮擊。金人大敗。退屯紫金山。是役也。失將士九百人。金人死者以萬計。而濠圍猶未解。欲往救之。距濠六十里。聞城陷矣。召存中。錡謀之。錡謂存中何以處此。存中曰。惟戰耳。相公與太尉在後。存中當居前。錡曰。朮來救濠。濠既已失。進無所依。人懷歸心。勝氣已索。此危道也。不若退師據險。俟其去。爲後圖。諸將皆曰。善。鼎足而營。遣人俟敵。曰。已去矣。俊欲自以爲功。謂錡毋往。命存中與德偕至濠。列陣未定。烟起城中。金人伏騎萬人。分兩翼出。存中顧德曰。何如。德曰。德小將焉敢預事。存中因以策麾軍曰。那回。諸軍以爲令其走也。遂散亂南奔。無復紀律。金人追殺甚衆。存中乃自宣化渡江歸行在。加檢校少保。開府儀同三司。蓋錄柘臯之功。而掩濠梁之敗也。時金主亮有南侵意。存中上備敵十策。步帥趙密謀奪存中權。因指爲喜功生事。存中聞之。上章乞免。密竟代之。未幾邊聲日急。劉汜戰敗于瓜州。命存中往京口。爲守江計。虞允文自采石來。命存中與之協力拒敵。敵不能濟。金主亮死。金人請和。存中奏。俟彼得新主之命。無遽許之。帝如建康。詔存中扈蹕。因語宰相曰。楊存中惟命東西。忠無與二。朕之郭子儀也。隆興二年。金人再入關。議割蜀之和。尙原以畀之。存中入對曰。和尙原隴右之藩要也。敵得之則可以睥睨漢川。我得之則可下

兵秦雍。曩議與金人吳璘力爭不從。今璘在遠不及知。臣若不言。非特負陛下。亦有愧于璘。近者王師盡銳而後得。願毋棄。未幾。金人復攻淮甸。詔存中同都督江淮事。時諸軍各守分地。不相統一。存中集諸將調護之。始更相爲援。帝親獎之曰。諸將協和。互相策應。卿之力也。會金兵已深入。朝議欲舍淮保江。存中持不可。乃已。金卒在揚州。或勸存中擊之。存中不敢渡。獨臨江固壘。以老之。金人尋請盟。乾道二年卒。存中。天資忠孝。敢勇。大小二百餘戰。身被五十餘創。嘗以克敵弓雖勁。而蹶張難。遂以意創馬皇弩。思巧製。工發易中遠。人服其精。

斷曰

楊子存中。天生勇悍。寢幄扈從。適逢賊亂。數騎衝鋒。殺人無筭。遍體鮮紅。疑傷茜染。及解甲看。皆賊血。濺因賜醇醪。酌此血漢。旣征李成。彼衆萬萬。若不出奇。難破一旦。願請奇兵。馳擊其暗。果俘八千。餘俱遁竄。劉猗據山。矢如雨散。存中一呼。神魂斷。驚髻將軍。銳不可犯。帝喜得人。忠日可貫。惟命東西。子儀之伴。濠雖敗歸。柘功足按。君念及臣。庶幾無憾。

王德

王德。字子華。通遠軍熟羊寨人也。以武勇應募。隸熙帥姚古。會金人入侵。古軍懷澤間。遣德謀之。斬一酋而還。古曰。能復往乎。德曰。可。遂從十六騎。徑入隆德府治。執僞守姚太師。左右驚擾。德手殺數十百人。衆愕眙莫敢前。德械姚獻于朝。欽宗問狀。姚曰。臣就縛時。止見一夜叉耳。時遂呼德爲王夜叉。建炎元年。以

驛口橋賊疑爲誘騎擁衆欲西德麾騎大呼曰王師大至矣賊駭遁追殺甚衆成奔新息收散卒復戰賊見光世張蓋行陣不介冑知爲主帥并兵圍之德突圍擁光世還軍因而襲敗成授武略大夫金人攻揚州西軍多潰德趨宣化會叛將張昱張彥圍和州太守張績求援于德德兵薄城下賊不意其至大潰遲明接戰斬昱俘其兵騎萬數濟自采石光世方謀討苗劉之逆迎至建康謂德曰江都之擾不竄則盜公可仗義夜涉大江殉國急變遂以軍屬光世會苗劉走閩中詔德追擊隸韓世忠德欲自致功名而世忠不欲德爲之使遣親將陳彥章拔佩刀擊德德遂殺彥章尸諸市德至蒲城斬苗瑀擒馬柔吉送行在世忠訟其擅殺下臺獄侍御史趙鼎按德當死帝命特原之編管柳州時光世屯九江得楊惟中所失空頭黃勅卽以便宜復德前軍統制遣平信州妖賊王念經行次饒州會賊劉文舜圍城德引兵赴之文舜請降德納而誅之其餘不戮一人謂諸校曰念經聞吾宿留必不爲備倍道而趨一鼓擒之獻俘于朝詔還舊秩加榮州刺史四年光世鎮京口以德爲都統制金兵復南光世將退保丹陽德請以死捍江諸將恃以自強分軍扼險渡江襲金人收眞揚數郡旣而又遇敵于揚州北有被重鎧突陣者德馳叱之重鎧者直前刺德德揮刀迎之卽墮馬衆驚駭因揮騎兵乘之所殺萬計紹興元年秀州水賊邵青作亂德與戰于崇明沙親執旗麾兵拔柵以入青軍大潰他日黨衆復索戰諜言將用火牛德笑曰是古法也可一不可再今不知變此成擒耳先命合軍持滿陣始交萬矢齊發牛皆反奔賊衆殲焉青自縛請命德獻俘行

在。帝召見。褒賞特異。三年。光世宣撫江淮。當移屯建康。命韓世忠代之。德僅數十騎。自京口逆世忠。度將及麾下。乃徒步立道左。抗言曰。擅殺陳彥章王德。迎馬頭請死。世忠下馬攜其手曰。知公好漢。向來纖介不足真懷。乃設酒盡歡而別。六年冬。劉豫遣麟猊驅鄉兵三十萬。分東西道入寇。中外甚恐。議欲爲保江計。殿帥楊沂中及德等分兵禦之。大敗猊兵于藕塘。猊挺身走。麟在順昌聞之。亦拔砦遁。追至壽春。弗及。德獲其糧舟四百艘。策功除武康軍承宣使。會光世罷宣撫。詔德盡護其衆。以酈瓊副之。瓊與德故等夷。恥居其下。率衆叛。從劉豫。十年。德解潁昌圍。俊檄德就取宿州。德倍道自壽春馳至。斬縣。與敵游騎遇。遂入城。假旗臥鼓。騎引去。因潛師宿州。夜半薄賊營。敵將高統軍詰朝壓汴而陣。僞守馬秦同知耶律溫以三千人沮水邀戰。德策馬先濟。步騎從之。遙謂賊曰。吾自與金人大小百餘戰。雖名王貴酋。莫不靡碎。爾何爲者。賊遂投兵降。馬秦耶律溫馳入。閉門城守。德至呼秦諭以逆順。乃自縊而下。德叱其子順先登。秦率溫降。遣詣行在。德乘勝趨亳州。會俊于城父。時叛將酈瓊屯亳。聞德至。謂三路都統制曰。夜叉未易當也。遂遁。德入亳州。白俊曰。今兵威已振。請乘破竹之勢。進取東都。俊難之。乃班師。策功第十一年。金人自合肥入。侵游騎及江。俊議分軍守南岸。德曰。淮者江之蔽。今棄淮不守。是謂唇亡齒寒也。敵數千里遠來。餉道決不繼。及其未濟。急擊之。可以奪氣。若遲之。使少安。則淮非吾有矣。俊猶豫未許。德請益堅。曰。願父子先越江。俟和州下。然後宣撫北渡。俊乃許。德卽渡采石。俊督軍繼之。宿江中。德曰。明日當會食。歷陽已而夜拔和州。晨迎俊入。敵退保昭關。又擊走之。追至柘臯。與金人夾河而軍。諸將帥俱集。惟張俊後至。

田師中欲待之。德怒曰：「事當機會，復何待？」徑上馬，兀兀以鐵騎十餘萬夾道而陣。德曰：「敵右陣堅，我當先擊之。」麾軍渡橋，首犯其鋒。一酋披甲躍馬始出，德引弓一發而斃。乘勝大呼，令萬兵持長斧，如牆而進。敵大敗，退屯紫金山。德復尾擊之。劉錡謂德曰：「昔聞公威略如神，今果見之。」請以兄禮事，召拜清遠軍節度使。建康府駐劄御前。二十五年卒，贈少傅。二子琪、順，亦以驍勇聞。

斷曰

王德夜叉，太師就縛，擒賊四方，如草被削。詔擊苗劉，當受韓約。欲自立功，殺人而作。按法當誅，帝原編。漢光世憐才，空勅補爵。妖賊念經，信州肆虐。一鼓擒之，罪以功脫。光世鎮江，金人南掠。德請捍之，殺賊賊卻。水賊邵青，戰敗計錯。思用火牛，射回自著。事急方降，上獻俘惡。道見世忠，請死如昨。下馬笑攜，好漢之略。再破麟猊，追瓊入亳。名王皆靡，何有微弱。守淮守江，氣方不奪。崛起英雄，古今誰若。





# 廣名將傳卷十六

王彥

王彥字子才。上黨人也。性喜韜略。金人攻汴京。彥慨然棄家赴闕。求自試討賊。招撫張所。異其才。擢爲都統制。使率裨將張翼。白安民。岳飛等十一將。部七千人。渡河與金人戰。敗之。復衛州新鄉縣。傳檄諸郡。金人購求彥急。彥慮變。夜寢累遷。其部曲覺之。相率刺面作赤心報國誓。殺金賊八字。以示無他意。彥益感勵。撫愛士卒。與同甘苦。未幾。兩河響應。忠義民兵。傅選等皆附之。衆至十餘萬。綿亙數百里。皆受彥約束。張浚宣撫川陝。奏彥爲前軍。初至漢中。浚與金將婁宿相持於富平。欲大舉。會諸將議。彥獨以爲不可。曰。陝西兵將。上下之情。皆未相通。若少不利。則五路俱失。不若且屯利閬興洋。以固根本。敵入境。則檄五路兵來援。萬一不捷。未大失也。浚幕府不然其言。彥卽請爲利路鈐轄。時中原盜賊蠭起。加以饑饉。無所資食。惟蜀富饒。桑仲旣陷淮安。襄陽衆號三十萬。欲乘勢西向。因申牘請於彥。曰。仲於公無敢犯。願假道入蜀。就食耳。彥乃遣統領官閔立爲先鋒。擊之。賊銳甚。立戰死。將士失色。或請避之。彥叱曰。樞相張公方有事關陝。若仲越金而至梁洋。則腹背受敵。大事去矣。敢言避者。斬。卽勒兵趨長沙坪。阻水據山。設伏以待。賊見官軍少。蟻附搏戰。彥執幟一麾。士殊死鬪。賊乃敗走。彥伏士進擊。追奔至白磧。復虜州。紹興元年。總管李忠反。擾京西。驍果善戰。彥與戰不利。關陷。彥退屯秦郊。令將士盡伏山谷間。焚秦郊積聚。僞若遁者。

秦郊距郡城二十里。路坦夷。彥募敢死士。易麾幟。設奇以待。閱再宿。賊至秦郊。官軍逆戰。大敗之。追襲至秦嶺。遂復祐縣以歸。忠走降劉豫。初。桑仲既敗。還襄陽。乃鳩集散亡。陷鄧州。凶焰復熾。分衆三道。一攻注口關。一出馬郎嶺。一擣郟陽。前軍去金州不三十里。彥曰。彼以我寡彼衆。故分三道。以離吾勢。法當先破其堅。則脆者自走。因自以親兵營馬郎。相持一月。大戰六日。賊大敗。仲爲其下所殺。其餘彥悉討平之。五年。差知荆南府。充歸陝荆門公安軍安撫使。彥因荆南曠土。措置屯田。自蜀買牛千七百頭。授官兵耕。營田八百五十頃。分給將士。九年卒于官。彥稱名將。當建炎初。屢破大敵。威聲振河朔。時方撓于和議。遽召之還。又奪其兵柄。而使之治郡。士議惜之。

斷曰

彥志慨然。自請討賊。張所異之。都統授職。部七千人。岳飛在側。刺面表誠。赤心報國。戰無不前。求無不得。桑仲恃強。請蜀就食。先鋒戰亡。將士失色。彥怒麾戈力戰。大克。忠反京西。秦郊阻塞。敢死設奇。忠敗而北。尋領荆南。屯田分給。惜哉。卒官。才未展畢。

劉子羽

劉子羽。字彥修。建之崇安人。學士幹之長子也。幹帥浙東時。子羽以機宜文字。佐父而破陸賊。幹守真定。會金人入寇。父子相誓守。金人不能拔而去。由是始知名。後京城不守。幹死之。子羽嘗論天下兵勢。當以秦隴爲根本。建炎三年。大將范瓊擁強兵。據江西。召之弗來。來又不肯釋兵。張浚與子羽密謀誅之。一日。

命張俊以千兵渡江。若備他盜者，使皆甲而來。因招俊、瓊及劉光世赴都堂議事，爲設飲食，食已，諸公相顧未發。子羽坐廡下，恐瓊覺，取黃紙趨前，舉以麾瓊曰：「下有勅將軍可詣大理置對。」瓊愕不知所爲。子羽顧左右擁置輿中，衛以俊兵送獄。光世出撫其衆，數瓊在圍城中，附金人迫二帝出狩狀，且曰：「所誅止瓊耳。汝等固天子自將之兵也。」衆皆投刃曰：「諾。」有旨分隸御營五軍，頃刻而定。瓊竟伏誅。浚以此奇其才，辟之參議軍事。明年金人窺江淮急，浚念禁衛寡弱，計所以分撓其兵勢者，遂合五路之兵以進。子羽以非本計爭之，浚曰：「吾豈不知此。顧今東南之事方急，不得不爲是耳。」遂比至富平，與金人遇，金人乘勝而前，宣撫使退保興州。人情大震，官屬有建策徙治夔州者。子羽叱之曰：「孺子可斬也。」四川全盛，敵欲入寇久矣。直以州口有鐵山棧道之險，未敢遽窺耳。今不堅守，縱使深入，而吾僻處夔峽，遂與關中聲援不相叶。進退失計，悔將何及。今幸敵方肆掠，未逼近郡，宣撫使當留駐興州，外繫關中之望，內安全蜀之心。急遣官屬出關呼召諸將，收集散亡，分布險隘，堅壁固壘，觀釁而動，庶猶可補前愆而贖後咎。奈何乃爲此言乎。浚然子羽言，而諸參佐無敢行者。子羽卽自請奉命北出，復以單騎至秦州，召諸亡將，諸亡將聞命大喜，悉以其衆來會。金人知有備，引去。明年吳玠經略河池，王彥鎮金州，二鎮皆饑，興元帥臣閉糴。玠彥病之，皆願得子羽守漢中，浚乃承制拜子羽利州路經略使，兼知興元府。子羽至漢中，通商輸粟，二鎮遂安。三年正月，王彥失守，退保石泉。子羽急移兵守饒風嶺。玠聞之大驚，卽越境而東。日夜馳三百里，至饒風列營拒守。金人悉力仰攻，死傷山積，更募死士由間道自祖溪關入，繞出玠後。玠遽邀子羽去，子羽不可。

而留玠同守定軍山。玠難之。遂西。子羽由興元退守三泉縣。從兵不滿三百。與士卒取草芽木甲食之。遺玠書訣別。玠時在仙人關。其愛將楊政大呼軍門曰。節使不可負劉待制。不然則政輩亦舍節使去矣。玠乃問道會子羽。子羽留玠共守三泉。玠曰。關外蜀之門戶。不可輕棄。復往守仙人關。子羽以潭毒山形斗拔。其上寬平有水。乃築壁壘。十六日而成。金人已至。距營十數里。子羽據胡牀坐于壘口。諸將泣告曰。此非待制坐處。子羽曰。子羽今日死于此。敵尋亦引去。張浚欲移鎮潼川。子羽遺浚書言已在此。金人必不南。浚乃止。撒離喝由斜谷北去。子羽謀邀之于武休。不及。既回。鳳翔遣十人持書旌招子羽。子羽盡斬之。而留其下。縱之還曰。爲我語賊。欲來卽來。吾有死耳。何可招也。先是子羽預徙梁洋公私之積。至是金人深入。餽餉不繼。又腹背爲子羽玠所攻。死傷十五六。疫癘且作。亟遁去。子羽出師掩擊。墮深澗死者不可勝計。餘兵不能自拔者悉降。始金人攻蜀。所選士率千取百。百取十。戰被重鎧。登山攻險。每一人前。輒二人推其後。前者死。後者被其甲以進。又死則又代之。其爲必取計如此。浚雖屺師。卒全蜀。子羽之力居多。浚還朝。議合兵大舉。子羽言。金人未可圖。宜益兵屯田。以俟機會。後金人入寇。子羽建議清野。淮東之人皆徙鎮江。俄而金人不至。浚問子羽。子羽曰。異時金人入寇。飄忽如風雨。今久遲回。定有他意。蓋金人以柘臯之敗。欲急和也。未幾果遣使議和。子羽十六年卒。

斷曰

子羽論勢。秦隴爲根。在朝臣子。范瓊不純。密謀議事。忽詔獄論。制伏已定。不容少存。金人攻急。議徙夔

門子羽大叱欲斬以徇夔峽僻遠誰寄聲聞宜出關外呼召諸軍分布險隘旋乾轉坤浚雖允議無人獻勸子羽自往衆始雲屯金知有備相引而奔二鎮饑饉輸粟如雲三泉死守不惜危身賊招子羽盡斬猶噴無門金遁全蜀功真始知立國在乎有人

### 魏勝

魏勝字彥威淮陽軍宿遷縣人也多智勇善騎射應募爲弓箭手紹興三十一年金人將南侵議籍諸路民爲兵勝躍曰此其時也因聚義士三百北渡淮取漣水軍宣布朝廷德意不殺一人漣水民翕然以聽遂取海州殺其僞守高文富父子民皆安堵遂權知州事遣人諭胸山懷仁沭陽東海諸縣皆定乃蠲租稅釋罪囚發倉庫犒戰士分忠義士爲五軍紀律嚴明益募忠義以圖收復遠近聞之響應旬日得兵數千金人遣蒙恬鎮國以兵萬餘來取海州抵州北二十里新橋勝帥兵出迎之設伏於隘以待賊至先殊死戰後伏發賊遂大敗殺鎮國馘千人軍聲益振山東之民咸願來附沂民壁蒼山者數十萬金人圍之久不下砦首滕彘告急勝提兵往救之陣于山下金人多伏兵勝兵遇伏皆赴砦金人襲之勝單騎而殿以大刀奮擊金人望見勝知其爲將以五百騎圍之數重勝馳突四擊金陣開復圍戰移時身被數十槍冒刃出圍金人追之馬中矢蹄步而人砦無敢當者又度敵必復攻海州因間出砦趨城中金人果解蒼山圍自新橋抵城下勝出戰皆捷金分兵四面攻之勝募士登城以禦矢石如雨者七日金人死傷多遁去勝起義久朝廷尙未知至是制置使李寶由海道覘敵始白勝之姓名於執政而知其戰功焉金主亮

舉兵渡淮。慮勝睨其後。因分兵數萬來攻。勝邀李寶同擊于新橋。大敗之。旣而金兵復至。先使人說勝使降。勝諭之曰。汝主叛盟失信。無故興兵。我朝以仁義之師來復舊疆。汝主渡淮必敗。爾等宜早來歸。必獲爵賞。時金兵已逼關。勝登關門。張樂飲酒犒軍士。令固守勿出戰。金人攻之。踰時。乃少遣士出。憑險隘擊之。金人知不可攻。因率軍渡河。襲關後。勝斂兵入城。金兵有追之者。勝獨乘馬逐叱之。曰。魏勝在此。聞者皆辟易。不復敢追。有新募士守河者。不知金兵。遽過河。勝恐絕河路。亟收軍入城。金兵追至東門。勝單騎逐而大叱之。金兵五百皆望風遁。勝又追至十數里。士始得入城。有不得入者。由城南入西門。金兵復自西南來襲。勝從後又逐叱之。金兵方駭散。手殺數人。奏功。差知海州兼山東路忠義軍都統。金兵一日黎明。乘昏霧四面而薄城。急攻。勝激厲士卒。竭力捍禦。矢石交下。金兵不能前。多死傷。乃拔砦走。及亮死。乃解去。勝善用大刀。能左右射。旗揭曰。山東魏勝。金人望見即退走。勝爲旗十數。書其姓名。密付諸將。遇鏖戰。即揭之。金兵悉避走。初勝起義時。無州郡糧餉之給。無府庫倉廩之儲。勝經畫市易。課酒推鹽。勸糶豪右。環海州度視敵兵攻取處。築城浚隙。寒關隘。在軍未嘗一日懈弛。恆如寇至。亮旣殞。勝益得自治軍旅。人皆精銳。獲金諜者。犒以酒食。厚賂遣還。有自北方來歸者。與之同臥起。共飲食。示以不疑。周其窶貧。使之感激。自是山東河北歸附者衆。得金人消息。悉以上聞。金人忽以兵十萬攻海州。時李寶帥海州。水陸並進。勝率衆合寶軍。大破之。斬首不可計。堰水爲之不流。餘悉奔潰。金人復遣五斤太師發諸路兵二十餘萬來攻海州。先遣一軍自州西南斷勝軍餉道。勝擇勇悍三千。拒于石闔堰。金軍不能進。金復益兵十

萬來奪。勝率衆麀戰。殺數千人。餘皆遁去。因下令守險勿追。衛民入城。居無何。金兵環城圍數重。勝與郭蔚分兵備禦。偃旗臥鼓。寂若無人。金兵驚疑。數日不敢攻。已乃植雲梯。置礮石。四面合圍。勝俟其近城。始鳴鼓張旗。矢石俱發。繼以火矢金液。凡三晝夜。金兵竟不能近。於是罷攻。修營壘。絕河道。謀爲固守。勝俟其不備。掩擊。或獨出攪之。使不得休息。又間夜發兵劫其營。或焚其攻具。旣而金人併力急攻。乃告急于李寶。寶因請張子蓋率兵來解圍。共與金軍大戰。斬首不可計。追數十里。餘兵皆遁。海州城西南枕孤山。敵至。登山瞰城中。虛實立見。故西南受敵最劇。勝築重城。圍山在內。寇至。則先據之。不能害。勝嘗自創如意戰車數百輛。礮車數千輛。車上爲獸面。木牌。木槍數十。垂氈幕。插牌。每車用二人推殺。可蔽五十人。行則載輜重器甲。止則爲營。掛搭如城壘。人馬不能近。遇敵。又可以禦箭鏃。列陣則如意車在外。以旗蔽障。弩車當陣門。其上置牀子弩。矢大如鑿。一矢能射數人。發三矢。可數百步。礮車在陣中。施火石。礮亦二百步。兩陣相近。則陣間發弓弩箭礮。近陣門。則刀斧鎗手突出。交陣則出奇兵。兩嚮掩擊。得捷則拔陣追襲。少卻則入陣間稍進。士卒不疲。進退俱利。尙便出擊。慮有拒遏。預爲解脫計。夜習不使人見。以其製上於朝。詔諸軍遵其式造焉。二年。以議和撤海州戍。命勝知楚州。勝專一措置清河口。時和議尙未決。金兵乘其懈。以舟載器甲糗糧。自清河出欲侵邊。勝覘知之。身帥忠義士。拒于清河口。金兵詐稱欲運糧往泗州。由清河口入淮。勝知其謀。欲禦之。都統制劉寶以方議和不許。金騎軼境。勝諸軍拒于淮陽口。自卯至申。勝負未決。金軍增生兵來。勝與之戰。又遣人告急于寶。寶在楚州相距四十里。堅謂方講和。決無戰事。遂

不發一兵。勝矢盡。救不至。猶依土阜爲陣。謂士卒曰。我當死此。得脫者歸報天子。乃令步卒居前。騎爲殿。至淮陰東十里。中矢墜馬死。事聞。贈保寧軍節度使。諡忠壯。

斷曰

魏勝彥威。天生豪傑。聚義渡淮。漣水交結。宣德朝廷。漣民大悅。遂取海州。自行其節。釋罪蠲租。忠分義別。大快人心。響應一轍。滕砦被圍。求救甚切。解圍蒼山。連戰皆捷。金人恃強。招降饒舌。責其叛盟。方纔無說。魏勝旌旗。凡戰前列。自製戰車。刀重箭鼻。海戍甚嚴。皆爲和撤。由清入淮。和不敢越。及敗盟侵。無兵應接。殺死報君。猶和不絕。

李寶

李寶。河北人。嘗陷于金。拔身從海道來歸。金主亮渝盟。聽奸民教。造舟將由海道襲浙江。諜聞。高宗曰。頃召李寶詢以和事。歷歷如數。且以一介脫身還朝。是必能事者。乃授浙西路馬步軍副總管。督海州捍禦。領舟百二十艘。兵三千。皆閩浙弓箭手。八月。次江陰。先遣其子公佐潛往。伺敵動靜。虛實。卽督舟啓行。軍士爭之。西北風力尙勁。迎之非利。寶下令敢阻大計者斬。遂發蘇州大洋。行三日。風甚惡。舟散不可收。寶慷慨顧左右曰。天以是試李寶心耶。寶心如鐵石不變矣。酌酒自誓。風卽止。明日散舟復聚。且有報言。公佐已挾魏勝得海州。乃喜曰。吾兒不負乃翁矣。士氣百倍。趨衆乘機進。適大風復作。海濤如山。寶神色不爲動。竟縱舟抵東海。敵已雲合圍海州。旌麾數十里。寶麾兵登岸。以劍畫地。令曰。此非復吾境。力戰與否。



在汝等。因握槳前行。遇敵奮擊。將士賈勇。無不一當十。敵出不意。亟引去。勝出城迎。寶獎其忠義。勉其共立功名。勝感泣。乃維舟犒士。遣辯士四出。招納降附。聲振山東。旣而發舟至膠西石臼島。時敵舟已出海口。泊唐島。相距僅一山。時北風盛作。王師薄敵。鼓聲震疊。海波騰躍。敵大驚。掣碇舉帆。風浪捲聚一隅。窘束無復行次。寶亟命火箭環射。箭所中。延燒數百艘。火所不及者。猶欲前拒。寶叱壯士躍登其舟。短兵擊刺。殪之舟中。餘盡中原舊民。皆登海岸。脫甲歸命。以故不殺。其餘賊與貨。斬獲殆盡。捷聞。上喜曰。朕獨用李寶。果立功爲天下倡矣。賜詔獎諭。又書忠勇李寶四字。表其旗幟。因除靜海軍節度使。賜金器玉帶。金主亮聞敗大怒。召諸酋約以三日渡江。適內變殺亮。向微唐島之捷。則亮之死未可期。錢塘之危可憂也。寶之功亦大矣。卒贈檢校少保。

斷曰

李寶陷金。拔身歸宋。金復渝盟。遣舟海哄。諜知其謀。捍禦備用。揭天風波。寶不爲動。連合海州。魏勝効勇。海舟望中。如雲之衆。僅隔一山。重重連控。寶揮羣兵。如馬磬鞞。橫槩直前。忽操忽縱。浪驚若雷。唐島相聞。火箭延燒。迴風亂迸。壯士登舟。斬獲快中。敵衆欲逃。恨海無縫。捷奏九重。羣將功頌。自此勳名。莫如寶重。

趙方

趙方。字彥直。衡山人也。舉進士。知青陽縣。告其守曰。催科不擾。是催科中撫字。刑罪無差。是刑罰中教化。

人以爲名言。時和議成。諸郡弛備禦。方獨招兵擇將。拔土豪孟宗政等補以官。增修山海八匱以壯形勢。荆門有東西兩山險要。復築堡其上。增戍兵以遏其衝。方知襄陽府。諜知金人圍棗陽急。因遣宗政等援之。已而金人敗。棗陽圍解。仍申飭諸將戒嚴。當遏於境上。勿使至城下。時麥正熟。方遣兵護民刈之。清野以待。金人復大舉圍棗陽。方計其空巢穴而來。若擣其虛。則棗陽之圍自解。乃命許國東向唐州。劉再興西向鄧州。又命子范葵後殿。時宗政權知棗陽。在城中日夜鏖戰。焚其攻具。金人不敢近城。西師由光化境出。砦于三尖山。拔順陽縣。金人率衆仰攻。大敗。再興與國兩道並進。掠唐鄧境。焚其城柵糧儲。棗陽城堅。金兵頓八十餘日。方知其氣已竭。乃召國再興還。併東師隸于再興。尅期合戰。宗政自城中出夾擊。殺其衆三萬。獲其輜糧器甲不可勝計。進方煥章閣直學士。方料金人數不得志于棗陽。必將同時並攻諸城。當先發以制之。命國宗政出師向唐。再興向鄧。戒之曰。毋深入。毋攻城。第潰其保甲。燬其城砦。空其資糧而已。宗政進破河陽縣。擒其千戶趙興兒。國與金人戰于泚陽。戮其將李提控。再興破高頭城。大敗金人。降者踵至。已而金兵至樊城。方命再興陣以待之。方視其師。金人三日不敢動。遂遁。金將阿海犯淮。西樞密院顏小驢屯唐州爲後繼。方先攻唐。伐其謀。再使再興發東陽兵擊其西。許國發桐柏兵擊其東。再興敗金人于唐城。斬小驢。圍其城五匝。垂下。會斬黃繼陷。詔趨方遣救。方乃命國還鄂州。保江。再興援淮。西金兵皆大敗。進方顯猷閣大學士。方起自儒生。帥邊十年。以戰爲守。合官兵爲一體。通判總司爲一家。持軍嚴。每令諸將飲酒勿醉。嘗使日日可戰。故淮西一境獨全。

趙方儒者。頗識兵機。催科刑罰。正論入微。和雖有議。兵不可違。土豪宗政。拔之相依。棗陽有急。立命解圍。金兵再至。東西指揮。視其力竭。忽盡召歸。中外夾擊。斬獲不稀。金屢失利。定復逞威。棗陽唐鄧。攻必同時。先發者是。後發自非。小驢既斬。五匝城危。斬黃促詔。開籠鳥飛。進官學士。不愧宣徽。

## 孟宗政

孟宗政。字德夫。絳州人。父林。從岳飛至隨州。因家焉。宗政自幼豪偉。有膽略。常出沒疆場間。嘉定十年。金人犯棗陽。圍急。趙方檄宗政往救之。宗政午發。峴首遲明。卽抵棗陽。馳突如神。金人大駭而遁。方聞捷大喜。差權棗陽軍。宗政初賦事。一愛僕犯新令。立斬之。軍民股慄。十一年。金帥完顏賽不擁步騎圍城。宗政與劉再興合兵與角。歷三月。大小七十餘戰。宗政身先士卒。金人戰輒敗。忿甚。周城開濠。四面控兵列濠外。飛鋒鏑。以絢鈴自警。鈴響則犬吠。宗政厚募壯士。乘閒突擊。金人不能支。盛兵薄城。宗政隨方力拒。適許國援師至。宗政出城夾擊。金人奔潰。十二年。金帥完顏訛可擁步騎薄城。宗政囊糠盛沙。以覆樓柵。列甕澗水。以防火攻。募礮手擊之。一礮輒殺數人。金人選精騎二千。號弩子手。擁雲梯。天橋先登。又募鑿銀礦石工。晝夜陷城。又運茅草直抵圍樓下。欲焚樓。宗政先燬樓。掘深坑。防地道。創戰棚。防城隕。穿窬纔透。卽施毒烟烈火。鼓鞴以薰之。金人窒以濕氈。析路以劄土。城頽樓陷。宗政撤樓益薪。架火山以絕其路。列勇士。以長槍勁弩備其衝。距樓陷所數丈。命築偃月城。袤百餘丈。翼傅正城。深坑倍仞。躬督役。五日成。金

人擇強兵披厚鎧。氈衫鐵面而前。又濕氈濡革。蒙火山。覆以冰雪。擁雲梯。徑抵西北圓樓。登城。城中軍以長戈舂其喉。殺之。勇敢軍自下夾擊。金兵墜死。燎焰自昕至昃。死傷踵接。梯橋盡燬。金人連不得志。俄乘順風渡淮。飛脂革燒戰棚。宗政激將士血戰。金兵死者千餘。射其都統殪之。天忽反風。金人愈忿。礮愈急。會王大臣領卒一千。冒重圍。轉鬪入城。內合外勢。士氣大振。賈勇入金營。自晡至三更。金人橫屍遍地。奪其銅印十有六。訛可棄帳走。獲輜重牛馬萬計。捷至。陞武功大夫。兼關門官贊舍人。重賜金帶。籍其勇壯。號忠順軍。俾出沒唐鄧間。威振境外。金人呼爲孟爺爺。俄病疽卒。宗政于有功者。怨必賞。有罪者親必罰。好賢樂善。出于天性。未嘗學兵法。而暗與之合。死之日。邊城爲罷市慟哭。

斷曰

宗政豪偉。功歷疆場。忽奉趙檄。解圍棗陽。午發峴首。明卽至疆。賊驚神速。早遁他方。趙聞捷喜。遂命掌堂。金兵再至。勢甚猖狂。戰經七十。金輒敗亡。令人憤怒。開濠掘障。誓必城破。以逞其強。雲梯上擊。地穴下椿。瀦水防火。募礮以傷。百攻百備。適足相當。會援轉鬪。內外奮揚。金人敗去。宗政名香。閣門宣贊。膺帝寵光。病疽俄死。罷市慟傷。

孟珙

孟珙字璞玉。隨州棗陽人也。嘉定十年。金人犯襄陽。父宗政以兵禦之。珙料其必闕樊城。請由羅家渡濟河。宗政然之。翌日。令諸軍臨渡布陣。金人果至。伏發。殲其半。十二年。完顏訛可率步騎二十萬。分兩路攻

棗陽城。琪登城射之。將士驚服。宗政命琪取他道劫金人。破砦十有八。斬首千餘級。大俘軍器以歸。金人遁。紹定元年。琪白制置司。剏平堰于棗陽。自城至軍西十八里。瀆河水。溉田十萬頃。立十莊三轄。使軍民分屯。是年。收十五萬石。六年。元將那顏倂蓋追金主守緒。逼于蔡。因檄琪戍鄂。討金。金唐鄧行省武仙。仙時與武天錫。及鄧守移刺瑗。互相犄角。欲迎守緒入蜀。天錫者鄧之農夫。乘亂聚衆二十萬。爲邊患。琪突逼其營。一鼓拔之。壯士張子良。斬天錫首以獻。俘其將士四百餘人。乃授江陵副都統。制賜金帶。檄問邊事。琪曰。金人若向呂堰。則八千不可少。已而金人犯呂堰。琪喜曰。吾計得矣。遂命諸將追擊呂堰。進逼大河。退逼山險。砦軍四合。金人棄輜重走。俘獲以萬計。移刺瑗遂奉書請降。琪入城。瑗伏階下請死。琪爲之易衣冠。以賓禮見。武仙初屯順陽。爲宋軍所撓。退屯馬蹬。其愛將劉儀來降。琪納之。因問仙之虛實。儀言仙所據石穴九砦。馬蹬沙窩。岵山三砦。蔽前三砦不破。石穴未可圖也。若先破離金砦。則王子山砦亦破。而三砦成擒矣。琪因遣人向離金。執黑旗。率衆入砦。金人不疑。爲宋軍。乃分據巷道。大呼縱火。掩殺幾盡。是夜壯士楊清。又誅金小元帥。金益恐。又遣樊文彬攻其前門。成明等邀截走路。殺僂山積。琪料武仙將上岵山。絕頂窺伺。因令樊文彬。詰旦奪岵山。駐軍其下。前當設伏。後遮歸路。已而仙果登山。及半。文彬麾旗。伏兵四起。仙衆失措。枕籍崖谷。兵至石穴。仙易服。與五六騎奔遁。隨隱不見。衆悉降。軍還襄陽。時金主守緒在蔡。元倂蓋約共攻蔡。制置使謀于琪。琪請以二萬人由真陽橫山南來。鼓行而前。金人戰敗。卻走。追至高廣陂。斬首千二百級。倂蓋遣人來迓。琪與射獵。割鮮而飲。約爲兄弟。南北軍毋相犯。已而金兵萬

人自東門出戰。珙遮其歸路。擁入汝河。擒其偏裨多人。進逼柴潭。立柵。翌日命諸將奪柴潭樓。蔡人恃潭爲固。相傳下有龍。人不敢近。將士疑畏。珙因召麾下曰。柴潭非天造地設。彼所恃此水耳。決而注之。洄可立待。因鑿其兩翼。潭果決。實以薪葦。遂濟師攻城。城破。開西門。招僇蓋入。時守緒已縱火自焚。珙與僇蓋因分守緒骨。還軍棗陽。帝贊曰。卿名將之子。破蔡滅金。功績昭著。因問恢復。珙對曰。願陛下寬民力。蓄人材。以俟機會。帝又問和議。珙曰。臣介冑之士。當言戰。不當言和。賜費甚厚。三年。珙至黃壇。浚隍。蒐訪軍實。邊民來歸者日以千數。爲屋三萬間居之。厚加賑貸。元兵攻蘄州。珙遣兵解其圍。元兵攻江陵。珙自率軍援之。元軍分兩路。一攻復州。一在枝江。監利縣編筏窺江。珙變易旌旗服色。循環往來。夜則列炬照江。數十里相接。躬視節度。破砦二十四。還民二萬。嘉熙元年。授鄂州諸軍統制。元將忒沒解入漢陽口。温不花入淮甸。江帥萬文勝戰不利。珙入城。軍民喜曰。吾父來矣。駐帳城樓。指畫戰守。卒全其城。將士彌月苦戰。病傷者相屬。珙遣醫視療。師皆感泣。初詔珙收復荆襄。珙謂必得郢。然後可以通餽。得荆門。然後可以出奇兵。由是指授方略。發兵深入。所至皆以捷聞。珙奏略曰。取襄不難。而守爲難。非將士不勇也。非車馬器械不精也。實在乎事功之不給耳。襄樊爲朝廷根本。今百戰而得之。當加經理。如護元氣。非甲兵十萬不足分守。與其抽兵于敵來之後。孰若保此全勝。上兵伐謀。此不爭之爭也。乃置先鋒軍。以襄郢歸順人隸焉。又條上流備禦。爲藩籬三層。乞創制副司。及移關外都統一軍於夔。任涪南以下江南之責。爲第一層。備鼎澧爲第二層。備辰沅靖桂爲第三層。峽州松滋。須各屯萬人。舟師隸焉。歸州屯三千人。鼎澧辰

沅靖各五千人。榔桂各千人。如是則江西可保。又度師必因糧於蔡。遣張德劉整分兵入蔡。火其積聚。四川制置使陳隆之與副使彭大雅不協。交章於朝。珙曰。國事如此。合智並謀。猶懼弗克。而兩司方勇于私鬪。豈不愧廉藺之風乎。馳書責之。陳彭得書大愧。因改釐蜀政之弊。軍無宿儲。珙大興屯田。調夫築堰。募農給種。首秭歸。尾漢口。爲屯二十。爲莊百七十。爲頃十八萬八千二百八十。上屯田始末與減餉之數。降詔獎諭。諜知元將也可那延。以騎兵經商州。取鶴嶺關。珙遣王令屯江陵。鄧州。劉全屯沙市。焦進提千人。自江陵荆門出襄。檄劉全齋十日糧。取道南漳入襄。與諸軍合。元兵至三川。珙下令應出戍主兵官。不許失棄寸土。權開州梁棟乏糧。還司。珙曰。是棄城也。斬其首以徇。由是諸將奉令惟謹。珙言沅之險不如辰。靖之險不如沅。三州皆當措置。而靖尤急。今三州粒米寸兵。無所從出。此京湖之憂一。江防上自秭歸。下至壽昌。互二千里。自公安至峽州。灘磧凡十餘處。隆冬水涸。節節當防。此京湖之憂二。今尺籍數虧。既守灘磧。又守關隘。此京湖之憂三。陸抗有言。荊州國之藩表。如其有虞。非但失一郡。當傾國爭之。若非增兵八萬。併力備禦。雖韓白復生。無所展巧。今日事勢。大略相似。詔京湖調兵五千。戍安豐。援壽昌。珙遣劉全將兵以往。繼有命分兵三千備齊安。珙言黃州與壽昌三江口隔一水耳。須兵節度。何必預遣。先一日則有一日之費。無益有損。萬一上游有警。我兵已疲。非計之得也。不從。樞密調兵五千赴廣西。珙移書執政曰。大理至邕數千里。部落隔絕。今當擇人分部數郡。使之分治生夷。險要形勢。隨宜措置。創關屯兵。積糧聚芻於何地。聲勢旣張。國威自振。計不出此。而聞風調將。空費錢糧。無補于事。不聽。元將大納至江陵。遣

楊全伏兵荆門以戰。琪先期諜知。達于樞密。檄兩淮爲備。兩淮不知也。後果如所報。行省范用吉密通降款。以所受告爲質。琪白於朝。不從。琪因歎曰。三十年收拾中原人。今志不克伸矣。病遂革。乞休政。終於江陵府治。是月朔。大星隕于境內。聲如雷。薨之夕。大風發屋折木。累贈太師。封吉國公。諡忠襄。

斷曰

孟琪才賢。能經善權。棗陽旣守。河水溉田。十莊三轄。歲歲有年。元將倭蓋。檄討武仙。先誅天錫。次降刺瑗。武仙將獲。忽遁而潛。倭蓋畏服。臘飲割鮮。約爲兄弟。戒毋犯焉。帝問恢復。勢已倒懸。寬力蓄材。以俟機緣。金旣破滅。改而防元。荆襄樊漢。百計保全。一謀一策。無不了然。時衰君懦。盡付空言。齋志以沒。憑誰問天。

杜杲

杜杲。字子昕。邵武人也。江淮制置使李珣。羅致幕下。滁州受兵。檄杲提偏師往援。甫至。民蔽野求入避。滁守固拒。杲啓鑰納之。金人圍城數重。杲登城中矢。益自奮厲。卒全其城。浮光兵變。杲單騎往誅其渠魁。守將爭餉金幣。悉封貯一室。臨行反之。安豐守告戍將扇搖軍情。且將爲變。帥欲討之。杲曰。是激使叛。請與兩卒往。呼將諭之曰。而果無他。可持吾書詣制府。將即日行。一軍帖然。李全犯邊。朝廷以杲久習邊事。擢知濠州制置大使。趙善湘謀復盱眙。密訪於杲。杲曰。賊恃外援。當斷盱眙橋梁以困之。卒用其策。成功。金衆數萬駐榆林阜。請降。輜重甚富。或請誘而圖之。杲曰。殺降不仁。奪貨不義。納之則有後患。諭而遣之。趙



善湘等出師。詔問守禦策。臬上封事曰。沿淮旱蝗。不任征役。中原赤立。無糧可因。若虛內事外。移南實北。腹心之地。必有可慮。及兵敗洛陽。人始服其先見。再知濠州。未行。改安豐。元兵圍城。臬繕完守禦。元以火礮焚樓櫓。臬隨陷。隨補完。元令拔都魯砍牌權木。拔都魯者。死囚。爲之攻城。以自贖。臬募善射者。以小箭射其目。拔都魯多傷而退。元填壕爲二十七壩。臬分兵扼壩。元乘風縱火。俄而風雪驟作。臬募壯士奪壩。路士皆奮躍死戰。會池州都統制呂文德突圍入城。合力捍禦。元兵引去。御書慰諭之。朝論諸帥。淮西無逾杜臬者。遂詔以安撫兼知廬州。察罕帥兵號八十萬。圍廬州。於濠外築土城六十里。穿兩濠。攻具皆數倍於安豐時。臬極力守禦。元築壩高於城樓。臬以油灌草。卽壩下煉之。皆爲煨燼。又于串樓內立雁翅七層。俄礮中壩上。衆驚。臬乘勝出戰。元兵敗走。臬追躡數十里。元兵知不能進。遂引師北歸。詔加臬淮西制置使。臬屢疏請老不許。旣而乞去。愈力。遂以直學士奉祠。未幾臬卒。臬淹貫多能。嘗言吾兵間無悖謀。左畫得於四書。

斷曰

杜臬善謀。謀皆有濟。蔽野難民。許入城避。兵變浮光。渠魁誅棄。金幣爭遺。封貯不費。告將動搖。衆驚有異。臬諭以書。無他。赴吏將卽日行。一軍安利。金衆欲降。輜可誘致。殺降不仁。奪貨不義。受恐後虞。諭遣爲是。詔問戰機。臬上封事。中原赤存。一時難治。實北移南。腹心可慮。兵敗洛陽。人服其智。元將焚樓。隨陷。隨備。處處成功。皆臬畫計。何無悖謀。四書得意。

